

დასავლეთკავკასიელი საქართველოს



La Géorgie

Indépendante

Revue mensuelle

JUILLET

1935—№ 115

ს ა ქ ა რ თ ვ ე ლ ო ს პ ო ლ ი ტ ი კ უ რ ი პ ა რ ტ ი ე ბ ი ს ო რ გ ა ნ ო .

შ ი ნ ა ა რ ს ი :

მაგიერო—დასასრულის დასაწყისი?

ერთა ლიგის დამხმარე. საზოგ. საერთ. კონგრესი.

ა. ყდრეკლიანი—დიდი ლტოლვილი.

ი. ხალაყაია—წყნარ ოკეანეს პრობლემა.

ემ. ლ—ძე—კარგი პრესა.

კ. კავაბაძე—კომუნისტები საქართველოში.

ნაუტი—წერილი ამერიკიდან.

იტალიელი ჟურნალისტი რუსეთში.

კავკასიის ერთა დამ. საერთო დღეს. ვარშავაში.

ჩრდილო-კავკასიელთა შორის. და სხვ.

დასასრულის დასაწყისი?

ვინც საბჭოთა კავშირის სინამდვილეს დღეს თუნდაც ზერეულად იცნობს და კიდევ შერჩენია ოდნავი მიუდგომლობა, არ შეიძლება არ დაგვეთანხმოს, რომ მსოფლიოს ეს მეექვსედი ნაწილი წარმოადგენს მონურ ფსიქოლოგიის გამეფების მიუწდომელ მაგალითს; თამამად შეიძლება ითქვას, რომ კაცობრიობის მთელ ისტორიის მანძილზე არც ერთ დიქტატორს, არც ერთ ცნობილ დესპოტს არ ღირსებია ისეთი «გალმერთება», ისეთი უცოდველი კერპობა, როგორიც წილად ხვდა საბჭოთა კავშირის დღევანდელ დესპოტს. ვერც ერთი სირცხვილისა და ნამუხისს მქონე ადამიანი ვერ იტყვის, რომ ამ საზღაპრო განდიდების წყარო იყოს სიკეთით აღვსილისა და გაბედნიერებულის სიყვარული თავის კეთილისმყოფლისა და გამაბედნიერებლის მიმართ: ზოლოგიური შიშით შეპყრობილი მონა აქებს და აღმერთებს შიშის მგვრელ დესპოტს.

მონობაში ჩავარდნილ საბჭოთა კავშირის ბედგამწარებულ მცხოვრებს არ შეუძლია ენა ისე მოაბრუნოს, რომ თავის სიტყვაში—თუნდაც იგი მზისა და მთვარის დაბნელებაზე ლაპარაკობდეს—სტალინის ქება-დიდება არ ჩაურთოს და მისი მიუწდომელი გენიოსობა არ დაიმოწმოს, მისი კაცთმოყვარეობა და სათნოება არ აღიაროს. ვისაც თავისი ტანჯული სიცოცხლე სავსებით არ გაუწირავს, სხვანაირად მოქცევას ვერ გაბედავს; სულ ერთია ვინც არ უნდა იყოს იგი,—კომუნისტი თუ უპარტიო, პოლიტიკუ-

რი მოღვაწე თუ მეცნიერი, მწერალი თუ უბრალო მომსახურებელი—ყველასთვის სავალდებულოთ არის გამხდარი წამდაუწუმ იძახას: ჩვენი სტალინი, დიდი სტალინი, საყვარელი ბელადი და სხვა.

მაგრამ ცხოვრებას თავისი გარდაუვალი ლოღიკა აქვს; საბედნიეროდ ამ ქვეყნად არაფერია მუდმივი და დაუსრულებელი. მონობის სამეფოდან ამ უკანასკნელად მიღებული ცნობები მოწმობენ, რომ მათი მოთმინება თავის დასასრულს უახლოვდება. ამას წინეთ დეპეშათა სააგენტოებმა გვაუწყეს, რომ ლალატსა და შეთქმულებას თვით კრემლშიც კი უჩენია თავი. თუ ხმებს დაუჯერებთ—და აქ დაუჯერებელი არაფერია—შეთქმულებს მიზნად ჰქონიათ სამხედრო გადატრიალების მოხდენა და «საყვარელ სტალინის» თავიდან მოცილება. თუ რამდენათ სერიოზულ ხასიათს უნდა ატარებდეს ეგ შეთქმულება, ეს იქედან სჩანს, რომ მასთან კავშირი ქონიათ კრემლის დამცველ რაზმებსაც. თვით ბოლშევიკების მიერ გამოქვეყნებულ ცნობებიდან ვიცით, რომ ამ უამად დიდი «წმენდა» ხდება კრემლში, განსაკუთრებული ყურადღება აქვს მიქცეული დაცვის საქმის გაჯანსაღებას. ჩვენ კარგად ვიცით, რას წარმოადგენს ეს «წმენდა» და გაჯანსაღება. შეშინებული სტალინი დღეს არავის ინდობს. მან უყოყმანოდ გასწირა თვით თავისი გუშინდელი ახლო მეგობარი აბელ ენუქიძე და ყოველგვარ ღირსება ახდის შორეულ ციმბირში უკრა თავი.



ერთ ემიგრანტულ გამოცემის მოსკოველ კორესპონდენტის ცნობით მოსკოვში სტალინს თვლიან «პაველ პირველის მდგომარეობაზე გადასრულად». იგივე კორესპონდენტი განაგრძობს, რომ «კიროვის მოკვლის შემდეგ იგი არავის ენდობა, თვით მის ახლობელ ამალიდანაც კი. ყველა ახლობელში იგი ხედავს «გრაფ პალენს». ამნაირად კრემლი დაემზგავსა «საინჟინერო კომეს». აქამდის სტალინი განაგებდა შიშის საშვალეებით, ახლა კი შიში განაგებს სტალინს. მას ეშინია თავისიანების და მზად არის დაეყრდნოს გარეშეებს». ყოველივე ეს სავსებით დასტურდება სტალინის უკანასკნელი თვეების საქმიანობით. მან გარეკა ძველი ბოლშევიკების საზოგადოება; ცხადია საკუთარი ტყავის შიშით შეპყრობილმა დიქტატორმა აქაც «კრამოლა» დაინახა და დააჩქარა ამ საშიში ფაქტორის თავიდან მოცილება. მან არ დაინდო არც ახალგაზდა კომუნისტთა კავშირი და მისი პოლიტიკური უფლებები თითქმის სავსებით შეკვეცა; ამიერიდან «კომსომოლს» შეუძლია იმოღვაწეოს მხოლოდ კულტურულ სარბიელზე, ხოლო ქვეყნის მართვა-გამგეობისა და მის სამეურნეო ცხოვრების საქმეებში ჩარევა მას სასტიკად ეკრძალება.

«ნეიე ფრეიე პრესეს» კორესპონდენტი ბასეხესი იტყობინება, რომ პარტიის «მემარცხნე ოპოზიცია თავის თავს აშკარად თვლის კომუნისტურ პარტიის გარეშე მდგომ ორგანიზაციად» და რომ ეგ მემარცხნე ოპოზიცია «ახალგაზდობის რიგებში პოპულარს მრავალრიცხოვან მიმდევრებს». კორესპონდენტის აზრით «მომავალი ანტისაბჭოური რევოლუციონური პარტიის ჩანასახი უფრო და უფრო ტივივდება საბჭოთა კავშირის ცხოვრების წედაპირზე.

ყოველივე ეს ფრიად საგულისხმიერო ნიშნებია. მონების მოთმინების ფიალა ავსებულა და სტალინის დასაყრდნობი ბაზა თანდათან ვიწროვდება. ცხადია, რომ ამ პროცესს ხელს შეუწყობს და კიდევ უფრო დააჩქარებს ექვის ქვეშ დაყენებულ თავისიანების წინააღმდეგ მიმართული სტალინის ახალი რეპრესიები. დღემდე გულის სიღრმეში ჩამარხული ფართული სიძულვილი დიქტატორისადმი დღეს აშკარა გამოსახულებას იღებს; შუბი ხალთაში დამალვას ვერ ახერხებს და ზოგიერთ შემთხვევაში მისი გაშიშვლებული წვერი მწარეთ იჩხვლიტება. ამ მხრივ მეტად დამახასიათებელია კომუნისტ ვინიჩენკოს «დია წერილი სტალინსა და პოლიტბიურის იმართ», რომელიც ამ დღეებში გამოქვეყნდა პარიზში. განსაკუთრებით აღსანიშნავია ის, რომ კომუნისტი, რომლის «უკლონისტობა» და ოპოზიციონე-

რობა დღემდე არსად თქმულა, ბედავს ემიგრანტულ გამოცემაში მოათავსოს საბჭოთა ხელისუფლებისა და უზენაესი დიქტატორის მომაკდინებელი კრიტიკით სავსე წერილი. იგი გაბედულად იწუნებს და სოციალიზმის დამასამარებლად მიაჩნია საბჭოთა ხელისუფლების «პაქტომანიობა» და მოსალოდნელ ომიდან გამარჯვებით გამოსვლაზე ოცნება; იგი უპატიოსნო თამაზად აცხადებს საერთო ფრონტის ქადაგებას უცხოეთში მაშინ, როდესაც საბჭოთა კავშირში ყოველივე უთანხმოება პარტიის მმართველ მიმდინარეობასთან ითვლება სახელმწიფო დანაშაულად და ისჯება განდევნით, კონცლაგერით, დატუსაღებით, კატორღით და ზოგჯერ სიკვდილითაც. თუ თქვენი საერთო ფრონტი არის არა მორიგი მანევრი, არამედ გულწრფელი და პატიოსნური განზრახვა, იგი უნდა განახორციელოთ საბჭოთა კავშირშიდაც. ურჩევს ვინიჩენკო სტალინს.

ის დასკინის კომუნისტურ ხელისუფლების ოციციალურ მტკიცებას, რომ თითქო საბჭოთა კავშირში ერთგული საკითხი იდეალურად იყოს გადაჭრილი. «დიდად სამწუხაროთ ეგ ასე არ არისო», აცხადებს გაბედული ავტორი და განაგრძობს: «თქვენი შეგნების სიღრმეში თქვენ, რა თქმა უნდა, კარგად იცით, რომ ამ საკითხის იდეალურად გადაჭრამდე ჯერ კიდევ შორს არის. ეგრედ წოდებული «ნაციონალისტური გადახრები», «უკლონისტების» შეუწყვეტელი დატუსაღებები, მათი დახვრეტები, მღელვარება მასებში, ყოველივე ეს მოწმობს იმას, რომ ამ მიმართულებით კიდევ არ არის დამყარებული სიწყნარე და მტკიცეული საკითხი არამც თუ იდეალურად, არამედ ოღნავ დამაკმაყოფილებლადაც არ არის გადაჭრილიო».

ცნობილია, რომ პირველი მერცხალის მოფრენა კიდევ არ ნიშნავს გაზაფხულის დადგომას, მაგრამ იგი უთუოდ მოწმობს გაზაფხულის მოახლოებას. ვინიჩენკოს გამოსვლა უდაოდ მოწმობს, რომ ახლო მომავალში საბჭოთა კავშირის მონობში ჩავარდნილ ხალხებსაც დაუდგებათ გაზაფხული. ხოლო თუ ამას ზედ დაუმატებთ კრემლის შეთქმულებას, ძველ ბოლშევიკების განდგომას და კომსომოლის გაოპოზიციონერობას, შეგვიძლია ვიფიქროთ, რომ კომუნისტური ხელისუფლების მდგომარეობა ძალიან შერყეულია და იგი ბუნებრივად უახლოვდება თავის დასასრულს.

მაკიერი.





მ რ თ ა ლ ი ბ ი ს

დამსხმარე საზოგადოებათა საერთაშორ. კონგრესი.

ბ. გიორგი გვაზავა იყო გაგზავნილი ბრიუსელში, როგორც საქართველოს დელეგატი, ერთა ლიგის დამსხმარე საზოგადოებათა საერთაშორისო კონგრესზე, რომელიც მოხდა 7-14 ივნისს.

მას დავალებული ჰქონდა:

1) გაეწია წინამდებარე, თუ ვინიცობა საბჭოთა რუსეთის დელეგაცია დააპირებდა შემოსვლას ერთა ლიგის დამსხმარე საზოგადოებათა საერთაშორისო კავშირში, და 2) დაცვა ქართველთა ასოციაციის უფლებანი, თუ ვინიცობა დადებოდა საკითხი მისი გამორიცხვისა ამ კავშირიდან.

როგორც ჰხდავთ, ასეთი პროგრამა ვერ ჩატარდებოდა ცხარე ბრძოლის მიუცემლად, სადაც ერთ-ერთ კიდევ გაიშლებოდა განათლებული ევროპის წინაშე საშინელი სურათი რუსეთის თავდასხმისა საქართველოზე და იმ ტანჯვისა, რომელსაც განიცდის ქართველი ერი; მაგრამ ბოლშევიკური დელეგაცია არ გამოცხადდა, ალბად დაინახა, რომ «სადაც არა სჯობს, ვაცლა სჯობს». სხვანაირად რომ ვსთქვათ, დაინახა, რომ იგი ვერ გამოჩნდება იქ, სადაც ლაპარაკია სამართალზე და მშვიდობიან განწყობილებებზე ერთა შორის. ამიტომ ჩვენი დელეგატიც ჩუმად იყო: არ მიეცა შემთხვევა საჯაროდ გამოსვლისა.

აღსანიშნავია მხოლოდ ერთი ინციდენტი. საკითხი იდგა უმცირესობათა შესახებ. უკრაინის დელეგატმა, ბ. სმოლ სტოკიმ, საჭიროდ დაინახა ჩარეოდა მსჯელობაში. წარმოსთქვა სიტყვა, განაცხადა, რომ უკრაინელები ბევრ სახელმწიფოში დიდ უმცირესობას წარმოადგენენ და მოითხოვა დაცვა მათი ინტერესებისა. ამ დროს წამოვარდა პროფ. ე. ბორელი, თავმჯდომარე საფრანგეთის დელეგაციის.— ეს ის ბორელია, რომელმაც წინამდებარე გაუწია საქართველოს საკითხს შარშან ფოლკსტონში (ინგლისში)—წამოვარდა და დაიყვირა: «ვისი სახელით ლაპარაკობთ? თქვენ ვინა ხართ? თქვენ არავის არ წარმოადგენთ!»

მაშინ უკრაინის მეორე დელეგატმა, ბ. შულგინმა, აიღო სიტყვა და უპასუხა: «მე მიკვირს, რომ საფრანგეთის წარმომადგენელი ასე უდიერად ექცევა უკრაინის წარმომადგენელსო. ჩვენ 40 მილიონი ხალხი ვართ, ამისთანა ხალხს აქვს თავისი ფასი მშვიდობიანობის დამყარებისათვისო. ბ. ბორელის გამოსვლა არ შეეფერება ამ ყრილობის ღირსებასო!» ბ. შულგინის რეპლიკას ყრილობა მიეგება ტაშის ცემით.

ინციდენტი თითქო ამოწურული იყო, უკრაინის დელეგატებიც ადგნენ და გავიდნენ გარედ; მაგრამ როცა უმცირესობაზე მსჯელობა გათავდა, პროფ. ბორელმა მოითხოვა სიტყვა პირადი საკითხისათვის და, სხვათა შორის, განაცხადა, რომ «საფრანგეთი ერთნაირად უღებს თავის კარებს ყოველნაირ გადმოსვწილებსო: იტალიელებს, გერმანელებს, რუსებს, ქართველებს, სულ ერთიაო...» აქ ბ. გვაზავამ მოითხოვა სიტყვა.

თავმჯდომარე ბ. ჯიანინი. მე ვთხოვ საქართველოს დელეგატს თავი შეიკავოს.

ბ. გვაზავა. შეცდომაა ფაქტიური და იურიდიულიც. ქართველები და უკრაინელები მსხვერპლნი არიან გარეგანი თავდასხმისა, არ შეიძლება მათი ერთ კალაპოტში მოქცევა რუსებთან და სხვა ლტოლვილებთან...

თავმჯდომარე. უკაცრავად, მე ვერ გავხსნი ეს-ლა დებატებს იმ სიტყვის გამო, რომელიც მხოლოდ პიროვნულ საკითხს შეეხებოდაო.

სხდომა რომ შეწყდა, ბევრი დელეგატი შემოესვია ბ. გვაზავას, რომელმაც მისცა ყველას საჭირო განმარტება აღძრულ საკითხის შესახებ. როცა პროფ. ბორელიც მიუახლოვდა ამ ჯგუფს, ბ. გვაზავამ აჩვენა მას საფრანგეთის მთავრობის თავმჯდომარის ბ. პიერ ლავალის წერილი, რომლითაც იგი ატყობინებს ქართველთა ოფისს პარიზში, რომ ქართველი ლტოლვილები არ ეკუთვნიან რუსეთის ლტოლვილებს, ისენი ქართველები არიან და არ უნდა იყვნენ არეული რუსებში... ბ. ბორელმა რომ წაიკითხა ეს წერილი, ხელი დააქნია: «ვერა გამიგია რაო!»

ამავე საგანზე ბ. გ. გვაზავას ჰქონდა მოკლე საუბარი ბელგიის მთავრობის თავმჯდომარესთან ბ. ვან ზეელანდთან. ბ. ვან ზეელანდი მოექცა ჩვენს დელეგატს დიდის ყურადღებით და, როცა ამ უკანასკნელმა გადასცა თხფენა, რომ ბელგიის მთავრობა მოპყრობოდა ქართველ ლტოლვილებს ისე, როგორც ეპყრობა საფრანგეთის მთავრობა, მან უპასუხა:

— მოახსენეთ ბ. ნორდანიას, რომ ჩვენ უკვე მივიღეთ ეს დადგენილებაო.

მართლაც ეს დადგენილება კიდევ მოუვიდა ჩვენს ოფისს. იმედი უნდა ვიქონიოთ, რომ ყველა განათლებული ქვეყანა მიბაძავს ამ მაგალითს და ამ ნაირად დაცული იქნება, რამდენად ეს შეიძლება ეს-ლანდელ პირობებში, საერთაშორისო სტატუტი საქართველოსი.

დიდი ლტოლვილი

(ვიქტორ ჰიუგო)

II.

პეტის აზრები და შესვდულებანი.— ჰიუგო ემიგრანტი.

ვიქტორ ჰიუგოს ცხოვრება იყო ფრიად შინაარსიანი. ეს ცხოვრება შეუჩერებელი და სრული გამაძრვება იყო პეტისთვის. ის ბედნიერ ვარსკვლავზე იყო დაბადებული (მან იხილა სინათლე ბუზანსონში 1802 წ. თებერვალში). მას ამ მხრივ შეედრება მხოლოდ გერმანელი გენიოსი გეოთე, რომლის სიცოცხლაც ასევე ხანგრძლივილი და გამოჩენილი იყო, მაგრამ უფრო წყნარი და ნაკლებად მრავალფეროვანი. ბედი სწყალობდა დიდ მგოსანს, თუმცა მან

მწარე მომენტებიც კი განიცადა *). უკვე ცნობილი, როცა ის თითქმის ბავში იყო (18 წლის), ჰიუგო უკვე გამოჩენილი და სახელგანთქმული მწერალი იყო, როცა მას 35 წელი შეუსრულდა. მის ირგვლივ თავს იყრდა აღფრთოვანებული ახალგაზრდობა, ვაჟი და ქალი; პოეტს თავყანს სცემდენ მცოდნენი და თვით უბრალო ხალხიც. დაჯილდოებული ბუნებისა და ადამიანისგან, ის 45 წლამდის ცხოვრობდა, როგორც მწერლობის პრინცი. მაგრამ სწორედ მაშინ, როცა მას შეეძლო ეგრძნო ტკბილი და უზრუნველი სიცოცხლე, ის შეიქმნა (ნაპოლეონ მე-III დროს) ლტოლვილი. ლტოლვილობაში მისი სახელი კიდევ იზრდება და ბრუნდება სამშობლოში 20 წლის შემდეგ, როცა ინგრევა იმპერია; ბრუნდება როგორც გმირი, როგორც შეუღარებელი შორსმჭვრეტელი, რომლის ტრადიკული წინასწარმეტყველება არა ერთხელ სრულდება ხოლმე.

სიცოცხლეში სახელითა და დიდებით განებივრებულს, სიკვდილის შემდეგაც უდიდესი პატივი ხვდა. არავის არ ღირსებია ისეთი დასაფლავება, როგორც ჰიუგოს. ეს იყო თავისი სიდიადით უჩვეულო სანახაობა, მთელი ერი (და უცხოეთიც) გლოვდა მის დაკარგვას. მას წილად ხვდა რამდენიმე დღეს განესვენა იქ, სადაც არც მანამდის, არც მას შემდეგ არავის არ ღირსებია გაკარება, თუ არა საფრანგეთის უცნობი ჯარის კაცს—Arc de Triomphe-ში. ამ ქამად კი—როგორც ვიცით—დიდი გვამის მუდმივი საბინადროა პანთეონი.

გ. ჰიუგო ყველა სხვა პოეტებზე უფრო სახელგანთქმულია. ის არის ზედმიწევნით პოპულიარული პიროვნება. მისი პიესები და რომანები ჩაწვდენ საზოგადოების გულის სიღრმეს. რომელ ფრანგს (ან თუ გნებავთ უცხოელსაც) არ უნახავს სცენაზე ჰერნანი ან Ruy Blaz? ვის არ წაუკითხავს, ან ვის არ უნახავს «Le Misérables-ი სინემის ეკრანზე? ამქამათაც პარიზში და პროვინციაში ის აქტუალურია. დარბაზები გაქედლია ხალხით, რომელიც აღფრთოვანებაში მოდის გენიის ნაყოფით. მის მიერ შექმნილი უკვდავი ტიპები: მარიუსი, კოზეტი, გაგროში და ჟან ვალ ჟანი—საყოველთაოდ ცნობილი არიან. პოეტის ძეგლებით მოკენულია ქვეყანა. საფრანგეთის ყველა ქალაქებში და სოფლებში თქვენ აუცილებლათ შეხვდებით ჰიუგოს ქუჩას, მოედანს ან ბულვარს, და მისი სახელი ცნობილია უკანასკნელი გლეხის მიერ უფრო მეტად, ვინემ ტიერი, გამბეტა ან პასტერი.

ჰიუგო ძლიერ პოპულიარულია; და ეს არც არის გასაკვირი: მას ესმოდა ხალხის, ხალხს ესმოდა მისი და ხალხმა შეიყვარა ის!

როგორ უცქეროდა ხელოვნებას დიდი მწერალი? ამ კითხვაზე იგი იძლევა პასუხს ერთ წერილში თავისი დრამატული ნაწარმოების შესახებ: «ამ დრამის ავტორმა—სწერს იგი—კარგად იცის, თუ რა დიადი და სერიოზული დარგია თეატრი. მან უწყის,

*) ეს მაშინ, როცა მოყვარულმა მამამ დაკარგა ძვირფასი შვილები. მწუხარების ეს მომენტები აღნიშნულია მის შეუღარებელ ლექსებში,

რომ დრამას აქვს (ხელოვნების მიუდგომლობის ფარგლებში დარჩენილს) მისია სოციალური, ეროვნული და კაცობრიული. «ხელოვნებამ არ უნდა ეძებოს მარტო მშვენიერება, არამედ სიკეთე, სარგებლიანობა». ჰიუგოს აზრით ხელოვნებისთვის საკმაოა, რომ დაასურათოს ძალდაუტანებლად და რეალურად ქვეშარიტება, ცხოვრება, ადამიანის ტიპები, ადამიანური გრძობები. ეს საკმაოა, რომ მკითხველმა ამის შემდეგ თვით გაიკვლიოს თავის გზა იხილოს სიმაართლე. მაგრამ აქვე უნდა დაეშაბოთ, რომ ასეთი თეორია ყოველთვის ვერ პოულობს გამართლებას ავტორის პრაქტიკაში, სადაც ცშირად გარკვეულ ტენდენციას აქვს ადვილი; ეს ჩვენის აზრით ადვილი გასაგებიც არის და განსაკუთრებით მაშინ, როცა მწერალი—პოეტი არის «ცოცხალი» არსება და მისი დროის საზოგადოების «მომქმედი» წევრი და შვილი. «საჭიროა—ამბობს ის—რომ ხელოვნება იყოს თვით მიზანი, რომელიც გააცნობიერებს ადამიანს, შემატებს მას მორალს, მოგვრის ცივილიზაციას... რაც ის იქნება უფრო მიუდგომელი, რაც უფრო ის გვერდს აუვლის წარმავალს, ყოველდღიურ პოლიტიკურ საკითხებს, მით უფრო ის შეწყობა ყოველივე დროისა, თუ ადგილის ადამიანს, მით უფრო მას ექნება მომავალის ფორმა» და სხვა. «ნუ იქნებით ნურც ოპოზიციის, ნურც ხელისუფლების, იყავით საზოგადოების, როგორც მოლიერი» და კაცობრიობის, როგორც შექსპირი», ამბობს კიდევ ჰიუგო. ხელოვნება და თეატრი უნდა იყოს პოპულიარული; ხელოვნებამ არ უნდა დაივიწყოს იდეალი, როცა ის მასსას მიმართავს ხოლმე. მასსას აქვს იდეალის ინსტიქტი... და სხვა.

რაც შეეხება პოლიტიკას, ჰიუგომ რამდენჯერმე შეიცვალა—ახალგაზრდობაში—თავისი შეხედულება, სანამ ის გახდებოდა გაკაყებული რესპუბლიკანელი. მაგრამ ეს ცვალეობადა სრულიად თავისუფალი და უმწიკვლო იყო და არასოდეს პირად სარგებლობას ან უინიანობას ადვილი არ ქონია. თითონვე იტყოდა ხოლმე: გებრი *) მუხლს იღრეკს მზის წინაშე, პოეტი კი მხოლოდ ქვეშარიტების წინაშეო.

ის ამბობს ერთ ადვილას: როცა ადამიანზე ამბობენ, რომ მას არ შეუცვლია აზრი 40 წლის განმავლობაშიო, ეს არ არის მისი შექება. ეს ნიშნავს, რომ ამ კაცისთვის არ არსებულა არც ყოველდღიური გამოცილება, არც დაფიქრება და სხვა. ეს ნიშნავს ქება შენსხვა წყალს იმტომ, რომ ის არ მოძრაობს, და ხეს იმისთვის, რომ ის მკვდარია... ყოველივე ცვალეობადია აზროვნებაში; არა არის რა აბსოლუტური პოლიტიკაში, გარდა შინაგანი მორალისა, მაგრამ მორალი სინიდისის საქმეა და არა აზრის. მამ ადამიანმა აზრი შეიძლება შეიცვალოს პატიოსნურად, მაგრამ მორალი უნდა დარჩეს. პროგრესიული თუ რეტროგადული მოძრაობა არის არსებითად ცხოველი, ადამიანური, სოციალური. სასირცხო ის არის, რწმენა რომ იცვალა პირად ინტერესებისათვის.

*) გებრი ერქვა იმ სპარსელს, რომელიც ხარლასტრის რელიგიას ეკუთვნოდა.



ახალგაზდობაში ჰიუგომ განიცადა ბონაპარტი-სტობა, შემდეგ ის რეალისტი-კათოლიკე იყო, მაგრამ უკვე 28 წლის ჰაბუკი მარცხნივ იწევს და დაბოლოს რესპუბლიკანობა ემხრობა და უკვე როგორც მებრძოლი—ან როგორც თითონ იტყოდა—რევოლუციონერი. (ერთ წერილში თავის თავს «დემოკრატ-სოციალისტსაც» კი უწოდებს). მის ნაწერებს—ლექსს თუ პროზას—დროისა და მიხედვით ამ სხვადასხვა შეხედულებათა დიდი ასვია. ლიბერალიზმი, თავისუფლებისა და დემოკრატიის იდეა, რომელსაც ის ასე ხანგრძლივად და გულწრფელად ემსახურებოდა—ჯერ ხელფენებაში გამოიჩინა, შემდეგ მან სასოფლოეობაში გადაიტანა და ცხოვრებაში გაატარა.

ჰიუგოს ლექსში, პროზაში და პუბლიცისტურ ნაწარმოებში ნათლად გამოსჭვივის მისი მაღალი გრძობები, ადამიანობა, სამართლიანობა, კეთილი გული. ჰიუგო დიდი პატრიოტია. მაგრამ პატრიოტი საღი გონების. მას სძაგს ომი და ქადაგებს ერთა შორის თანხმობას და თანამშრომლობას. ის მოითხოვს განიარაღებას. მისი იდეალი არ არის მხოლოდ ეროვნული, არამედ კაცობრიული. ის ქადაგებს ევროპისა და მსოფლიოს შეერთებულ შტატებს. ის მოსარჩლეა ყველა ჩაგრულის, კერძო ადამიანის თუ მთელი ერის. ეტრფის თავისუფლებას. უყვარს მეცნიერება, წინსვლა, ყოველივე პროგრესი. მან იცის, რომ ტექნიკა ძლიერ განვითარდება, რომ ჰაეროპლანები ცას დასერავენ; მას არ უნდა, ეს გამარჯვება ადამიანებმა ერთმანეთის გასაქლევად რომ გამოიყენონ. ჯერ კიდევ ახალგაზდობის ნაწერებში ითვისისწინებს ხალხის განვითარების გზებს. პოეტს უკვე წარმოდგენილი აქვს მომავალი ერთალიგა.

მკითხველმა იცის, თუ როგორ გაემეფა პირველი კონსული ნაპოლეონი და როგორ გააუქმა მან რესპუბლიკა. 40 წლის შემდეგ საფრანგეთის ხალხი ივიწყებს ამ ამბავს და ტახტზე აყავს ნაპოლეონ პირველის ძმისწული ლუი ბონაპარტი, ცნობილი ავანტიურისტი. ჯერ ის—რადაც საკვირველებით—რესპუბლიკის პრეზიდენტი ხდება, რამდენიმე წლის შემდეგ კი თავის თავს იმპერატორად აცხადებს. დიდი ისტორიკოსი მიშლეს სიტყვით რომ ვსთქვათ—ხალხმა თავის ხელით გამოიჭრა ყელი.

ვ. ჰიუგო—პარლამენტის წევრი—სხვა ბევრ პოლიტიკურ მოღვაწეებთან ერთად იძულებული შეიქნა ბარიკადებზე ბრძოლის შემდეგ თავი შეეფარებია უცხოეთში. ის ჯერ დაბინავდა ბრიუსელში, საიდანაც აღე გაძევებულ იქნა. შემდეგ ის სახლდება ინგლისში. ჯერხეში. აქედან ინგლისის პოლიცია (ნაპოლეონის მოთხოვნით) მას აძევებს და ჰიუგო გადადის გერმანიაში. პირველ ხანებში ჰიუგო და მისი დიდი ოჯახი განიცდის მატერიალურ შევიწროებას და ცხოვრებას ძლიერ ღარიბულად.


დიდი პოეტი უცხოეთში იჩენს არაჩვეულებრივ აქტიობას ყოველ დარგში: ლიტერატურაში, პოლიტიკაში, ქველმოქმედებაში. მისი ბევრი საუკეთესო ნაწარმოებთაგანი დაწერილია ემიგრანტობის ხანაში. პოლიტიკურ სფეროში ის განუწყვეტილად ებრძვის ნაპოლეონ მესამეს და მის მთავრო-

ბას, რომლის დაცემაში ვ. ჰიუგომ ითამაშა უპირველესი როლი... არც ერთი შემთხვევა არ გაუშვია დიდ ლტოლვილს, რომ არ ესარგებლა და არ გამოეყენებია. მისი ასეთი აქტიობა დიდ გავლენას ახდენდა საფრანგეთის ცხოვრებაზე. პოეტის დიდი და ავტორიტეტული ხმა უცხოეთიდან აღვივებდა სამშობლოში დემოკრატიულ ცეცხლს და აღრმავებდა ანტაგონიზმს საფრანგეთის ერსა და იმპერატორს შორის. მაგალითისთვის მოვიყვანთ ერთ ამონაწერს 1869 წ. გაზეთიდან («Siecle»). როცა ნაპოლეონის ტახტი გაიბზარა და ხალხი დიდი მანიფესტაციისათვის ემზადებოდა, დასახლებული გაზეთი სწერდა: «მძიმე პასუხისმგებლობა აწევს დღეს უკიდურეს პოლიტიკურ პოლიუსებზე მდგომ ორ ადამიანს. ერთი მათგანი ტახტზე წის: ეს არის ნაპოლეონ მესამე, მეორეა ვიქტორ ჰიუგო».

მაგრამ მსოფლიო მოქალაქე ჰიუგო მხოლოდ და მარტო თავის სამშობლოსთვის როდი იბრძოდა. ის იყო დიდი ვექილი ყოველი ჩაგრულის, ადამიანის თუ ერის. არა ერთი ერთი თუ პიროვნება მიმართავდა ხოლმე ჰიუგოს—ლტოლვილს და სთხოვდა შემწეობას და დახმარებას მათი უფლებების დასაცავად, ან აღსადგენად. მისი ავტორიტეტი და გაბედული ხმა ხშირად გაისმოდა ყოველგვარ ძალმომრეობისა და უსამართლობის წინააღმდეგ. ის იბრძოდა საბერძნეთისთვის, იტალიისათვის, უნგრელებისათვის; ებრძოდა ბარბაროსულ ცარიზმს პოლონეთისა და კავკასიისათვის, იცავდა კუბას ისპანის წინააღმდეგ, ჩინეთს ინგლისისა და საფრანგეთის წინააღმდეგ, იცავდა მექსიკის და ირლანდიის უფლებებს, ექიმავებოდა დარბეულ შავკანიან ამერიკაში, სასტიკ ბრძოლას უცხადებდა სიკვდილით დასჯის კანონს და სხვა.

ვიქ. ჰიუგო იყო ყველას მანუგეშებელი. «ერები სისხლს ღვრიან, მაგრამ არ კვდებიან», «არ არსებობს დიდი და პატარა ერი, ყველა ერს ერთნაირი უფლება აქვს», «არ არსებობს მომხდარარი ფაქტი (fait accompli), არის მხოლოდ უფლება», ქადაგებდა ის. «როცა ერთი მხრით არის მონობა «კეთილდღეობით» და მეორეს მხრით თავისუფლება სიღარიბითი, მე ვამტკიცებ: არ არსებობს ისეთი რესპუბლიკანელი ან სოციალისტი, რომელიც არ ამჯობინებდეს შავ პურსა და თავისუფლებას თეთრ პურსა და მონობას», ამბობდა თავისუფლების მოტრფიალე, ადამიანისა და ერის დიდი მოამაგე.

ჰიუგოს პატრიოტს, სამშობლოს მოშორებულს, რა თქმა უნდა, მწარე წამებიც ქონდა ლტოლვილობაში. მკითხველმა იცის, თუ რას ნიშნავს სამშობლოს გარეთ ყოფნა, განსაკუთრებით სამშობლოს უქონლობა, როცა ადამიანი თავს გრძობს ნიადაგ გამოცლილს, ჰაერში გამოკიდებულს, დამცირებულს მორალურად, ნივთიერად... მიუხედავად ამისა ვ. ჰიუგომ არ იცოდა, თუ რა არის სასოფარკვეთილება. გაუსწორებელი ოპტიმისტი. ღრმა რწმენის მატარებელი მუდამ ქადაგებდა ყველასთვის მხეობას, მორალურ ამაღლებას, სულის სიძლიერეს და იმედს. მას სწამდა მომავალი. მისი, სხვისი, ევროპის, კაცობრიობის. იმედიანობა, იმედიანობა, კვლავ იმედიანობა.



ჩვენთვის, გადმოსვნილთათვის დიდი ემიგრანტი და მისი ცხოვრება უნდა შეიქნას მაგალითი, მისაბძავი და გამამხნეველი. გავერთდეთ და ვიწამოთ მომავალი ჩვენი საქართველოს! გავუშკოავდეთ მწარე ბედს, მწარე აწყყოს. მყობადი ჩვენია!

ანტონ ქობულაძე.

ყენარ ოკეანეს პრობლემა

VIII

ჩრდილო მანჯურის ჩინეთისაგან მოწყვეტამ, რუსეთის ზღვის ნაპირა რაიონების სტრატეგიული მდგომარეობა გაართულა. ამ რაიონების იაპონიის მხრივ სამხედრო ოკუპაცია, ხელსაყრელი პირობების საკითხი გახდა. ვისაც მანჯურია ხელთ უბყრია, ვლადივოსტოკიც ადრე თუ გვიან მისია.

იაპონიის შიდა მონგოლიაში შექრამ, აქ სტრატეგიული პუნქტების დაპყრობამ, რუსეთს ბაიკალის აღმოსავლეთის ხაზით, საკმაო სიფათი მოუზნა. ეს ის ხაზია, რომლითაც არგუნი და ამური მიმდინარეობენ. ხაზი მეტად სათუთი და ადვილად ხელთ ჩასადები. საშიშროების წინ დამდგარი რუსეთიც, განსაკუთრებულის სიჩქარით შეუდგა შორეულ აღმოსავლეთში სამხედრო მზადებას.

მან ვლადივოსტოკი და ამურის ნაპირები გაამაგრა. ამ რაიონებში ჰაეროდრომები ააგო, დიდძალ ჰაეროპლანებსაც აქ თავი მოუყარა. მოსკოვ-ხაბაროვსკის შორის ახალი ლიანდაგი გაყავს. ორი ახალი ლიანდაგის გაყვანაც ბაიკალიდან ქვემო ამურამდე დაწყებულია. ეს გზა ნახშირით მდიდარ კორეის და ლითონით მდიდარ რაიონების გულს უნდა მისწვდეს. ახალ რკინის გზამ ჩელობინსკი-ემანჯელინსკის შუა უნდა გაიაროს და გზა შეამოკლოს მაგნიტოგორსკიდან ჩელობინსკამდე. განზრახულია შექმნას ახალი რკინის გზის, ბლაგოვეშჩენსკი-კარანოიარსკის მიმართულებით, სიგრძით 5 000 კილომეტრი. მან ბაიკალის ტბას ჩრდილოეთით უნდა მოუაროს და ხაბაროვსკი-ნიკოლაევსკის შორის გაიაროს. ამ გზას მხოლოდ სტრატეგიული მნიშვნელობა ექნება. სამხედრო მრეწველობა ურალიშია შექმნილი, სამხედრო და სამრეწველო ბაზები კუნენცკში. ცენტრალურ აზიაში ერთი ნავთის ბაზა გაჩენილია, მეორე ბაზის გასაჩენად ნიადაგია მომზადებული. მსუბუქი ინდუსტრია შორეულ აღმოსავლეთის მთელ რიგ ქალაქებში აწყობილია. შიდა გუბერნიებიდან შორეულ აღმოსავლეთისკენ დიდძალ გლეხობას ასახლებენ. მათ, გარეშე მონგოლიის საზღვრებიდან დაწყებული, ზღვის ნაპირებამდე «კოლხობები» უნდა შექმნან, ჯარისთვის სანოვავე ამზადონ. მიწას მიჯაჭვულმა მონებმა შვიდი ათასი კილომეტრის გასწვრივ, დახელოვნებულ ჩეკისტთა ზედამხედველობით მიწა უნდა ამუშავონ, თვით იმიომილონ, სხვები არჩინონ.

ცენზუს ყაზახთა ჯარის ნაწილები თავმოყრილია ციმბირში, სემირეჩინსკში, მაიაკალში, უსურთისკში და ამურზე. რუსეთის ჯარის მთავარი ნაწი-

ლები ზემო-უდინსკში და უსტ-სტრელსკის რაიონებში დაგროვილია. შორეულ აღმოსავლეთის საზღვაოსნო ხელისუფლების განკარგულებაში 50 წყალქვეშ მავალი ნაგებიც იმყოფება.

იაპონიასთან ომის დროს, რუსეთის ჯარს აკლდა ზარბაზნები, თოფები თუ სხვა ომისთვის აუცილებელი მასალა. ჯარის კაცი ცუდად იყო ჩაცმული, სუსტად იკვებებოდა. მოუწყობელი იყო სატრანსპორტო საშუალებანიც. ომისთვის აუცილებელი საგნები, რუსეთის შიდა გუბერნიებიდან ერთად ერთი ურალის გზით თვეების განმავლობაში შორეულ აღმოსავლეთისკენ ძლივს ძლივობით მიგორავდნენ. ამ დროს კი რუსის ჯარის კაცს, დაფლეთილ ფეხსაცმელებში, ორი-სამი კვირა უმოწყალო იაპონიის არტილერიის ქვეშ ბრძოლა უხდებოდა. უხეიროთ მოკაზმულ რუსის ჯარის ცხვირის წინ, იაპონია სრულიად დავისუფლად ნაპირებზე ჯარს ასხამდა და მტერს ერეკებოდა. მუდამ კმაყოფილებით აღსავსე მეფის მთავრობა კი ყურს არ იბერტყდა. მსხვერპლთა და დამარცხებთა დამალვა რუსეთის მთავრობის მეტად მოხერხებულ სისტემად გადაიქცა. გეკატომბათა პოლიტიკას გაყინული რუსეთი დიდხანს გაუშვებული შესცქეროდა. ბოლოს აინძრა. ნიკოლოზ მეორის მთავრობამ შინაურ დამარცხებას გარეშე დამარცხება ამჯობინა.

მას შემდეგ დიდ ომამდე ათწლეულები განვლო. რუსეთის ყველა ძველი ნაკლი ნაკლად დარჩა, ბევრი ახალი ნაკლიც თან დაემატა. დარჩა მოუწყვსირებელი სატრანსპორტო საშუალებანი, ჯარის მოკაზმული ობა, ჩაცმა და საზრდოს მიწოდება. სამხედრო მინისტრს ფრონტიდან ერთი ტელეგრამა მეორეზე მოდიოდა. ერთი იტყობინებოდა, 150 ათასი ჯარის კაცი უთოფოა, გვიშველეთო. მეორე იწერებოდა: 200 ათას ჯარის კაცს არც თოფი, არც ტყვია გააჩნია. მუხლმოდრეკით გეგედრებით, დაგვეხმარეთო. თოფის და ვაზნების საკითხი გერმანიის თუ სხვა ფრონტზე, «სისხლის» საკითხად გადაიქცა. «იღვევი ვაზნას» იყო ფრონტის სასოწარკვეთილი ძანლი. მარტო 1915 წელს ზაფხულში რუსეთის არმიამ უკან დახთვის დროს ერთი და ნახევარ მილიონზე მეტი ჯარის კაცი დაჰკარგა.

პეტერბურგის სასახლე და უნიჭო მართველობა გეკატომბას უზარმაზარ ფრონტებზე ძველებურად გულგრილად შეჰყურებდა. ფრონტის მდგომარეობის გამოსწორებაზე არავინ ფიქრობდა, ან გამოსწორების ნიჭი არავის გააჩნდა.

ფრონტის ნგრევაზე ვინც ხმას ამოიღებდა, იდევნებოდა ან იტუქსებოდა. უვიც და მონობაში აღზრდილ ხალხს ვინ რას ეკითხებოდა. დამარცხებთა და დახოცილთა რაოდენობას, როგორც იაპონიასთან ომის დროს, მთავრობა მოხერხებულად მალავდა.

ბოლოს ფრონტის უკმაყოფილება მრისხანებად გადაიქცა. ეს მრისხანება კუთხიდან კუთხემდე გაყინულ რუსეთში შეიჭრა. ყინული დაინძრა. დაგროვილმა ბოლშევიკებმა ამოხეტია. უზარმაზარ ტრაფუნმა არვინ დაინდო, დამნაშავეებთან ერთად, უდანაშაულონიც მილიონობით წალეკა.

დღევანდელ კრემლის მიერ აღმოსავლეთის ფრო-

ნტზე ყოყვლი დეტალი ჯარის შეიარაღების, ტყვია-
წამლის თუ სანოვაციის დამზადების მხრივ შესწავ-
ლილ-გამომუშავებულია. მეფეთა დროის უნძრევე-
ლი აზიის სამფლობელო ამოძრავდა, ძლიერ სამხე-
დრო სიმავრედ გადასაქცევად ემზადება. შორეულ
აღმოსავლეთის ფრონტი სტრატეგიულად გამძლე
ბაზაზე და ახლო საყვებავ წყაროებზე ეყრდნობა.
ბევრი ძველი ნაკლი კრემლის ახალ ბატონთა მიერ
გამოსწორებულია.

სამხანგვარი ათასი კილომეტრის მანძილზე, ორი
მოპირდაპირე—იაპონია და რუსეთი—თავიდან ფე-
ხებამდე შეიარაღებული, ერთი მეორეს გვერდითაა
გამოქმდიული. შიდა მონგოლიაში იაპონია გზას იკა-
ფავს, ახალ ტერიტორიებს იძენს, გარეშე მონგო-
ლიაში რუსეთი შეძენილ ტერიტორიებს ამავრებს,
მათ ახალ ტერიტორიებს უმატებს და მოპირდაპი-
რეთა საზღვრებიც მომავალში შვიდი ათასი კილო-
მეტრის სიგძეზე გაიჭიმება.

გასულ წელს წყნარ ოკეანეს ნაპირებზე იაპონია-
რუსეთს შორის ინციდენტები მეტად ხშირი, თით-
ქმის ყოველდღიური გახდა. ძლიერი ომის სუნი ატ-
ლანტიკის ნაპირამდენაც აღწევდა. ზარბაზნებს პირი
სასროლად ჰქონდათ დაღებული და მათ დაღებულ
პირიდან ჯოჯოხეთური ალი ამოსახეთქად იყო გამ-
ხადებული. კაცობრიობა, შორეულ აღმოსავლეთში,
დაირიყორების მალა აწეულ გაშეშებულ ხელებში,
სადირიყორო ჯოხებს შესხერებდა. ყველა გულის
ფანქალით მოელოდა, ხელი როდის დაქანდება,
ჯოხი როდის ათამაშდება, ზღვა და ხმელეთი როდის
ამეტყველდება. ვინ არ წინასწარმეტყველებდა—
აი დღეს-ხვალ—წყნარ ოკეანეს ნაპირები ავუგუნდება,
კაცთ ქმნილი ტაიფუნი ამოგორდება?

1904 წელს საფრანგეთის უდიდეს დიპლომატს
დელკასეს შეეკითხნენ: შორეულ აღმოსავლეთი დრუ-
ბლებით ხომ არ იმოსებაო. შემკითხველი მინისტ-
რები დელკასემ დაამშვიდა. მოქანცული დეკლასეს
კოლეგები, ტკბილად გამოსაძინებლად თავიანთი
ბინებისკენ გაეშურენ. გამოძინება მათ არ დასცალ-
და: იაპონიის ტყვიის ქუხილმა გამოადვიდა.

მას შემდეგ ათმა წელმა განსლო. გლეხი მოსა-
ვალს ეწეოდა. მუშა ქარხანაში მუშაობდა. მოხელე
კალამს აწრიპინებდა. ედუარდი გრეი უილტშირში
თევზებს იჭერდა. ინგლისის სხვა მინისტრებიც ჩამ-
ტვერიანებულ ფილტვების გასაწმენდად ლონდონს
გაექცენ. გერმანიის კაიზერი ნორვეგიის ფიორდებ-
ში დროს ატარებდა. კანცლერი ფრინველებზე და
ოთხფეხა ნადირებზე თავის სილენხიის მამულში ნა-
დირობა, გერმანიის საგარეო საქმეთა მეთაური სა-
ქორწილოდ მოგზაურობდა, გენერალური შტაბის
უფროსი ფონ მოლტკე კუჰს თუ ნერვებს საზღვარ-
გარეთელ კურორტზე წამლობდა. საფრანგეთის პრე-
ზიდენტ ტუანკარეს და საფრანგეთის პრემიერს, რუ-
სეთში სადარბაზოთ ჩამოსულთ ნიკოლოზ მეორე და
მისი მინისტრები ღიმილით პარიზისკენ აცილებენ.
ვის ჰქონდა იმ ხანად წარმოდგენილი, რომ რამოდენ-
იმე დღე გაივლიდა და ჯარის კაცები მილიონობით
ფრონტებს მიაწყდებოდენ, რომ ფრანგები 75 მილი-
მეტრიან ზარბაზნებს, გერმანელები «ბერტას», ინგ-

ლისელები ტანკებს აამუშავებდენ, რომ ათ მილიონ-
ნზე მეტი ხალხი დაინოცებოდა, რამდენიმე ათეუ-
ლი მილიონი დასახიჩრდებოდა, კაცობრიობა შავი
სუდარით შეიმოსებოდა?

ამ ხანათაც იყო წინასწარმეტყველი, რუსეთის
დიპლომატი ინვოლსკი; ისიც თოფის გავარდნის
წინა დღეებში ირწმუნებოდა, ევროპას ომი არ მოე-
ლისო.

დელკასე რუსეთ-იაპონიის ომის წინ, ინვოლსკი
დიდი ომის წინა დღეებში ცუდი მარჩიელნი გამოდ-
გნენ. მარჩიელთა რიცხვი უკანასკნელ წლებში გან-
საციფრებელივ გამრავლდა. ვის არ უმარჩიელნია
1934 წელს იაპონია-რუსეთს შორის ომი მოხდებოა.
1934 წელი ისტორიას ჩაბარდა. წყნარ ოკეანეს ნაპი-
რები ჯერ-ჯერობით ომის საშიშროებას გადაურჩა.
დიპლომატები თუ კალმის მოწრიპინენი 1934 წლის
მიწურულში შორეულ აღმოსავლეთში ომს 1936-37
წლებისთვის ნიშნავდენ.

ვნახოთ. მომავალი რას იტყვის? წინასწარმეტ-
ყველთა სიტყვები გამართლდება, თუ მომავალი
ომის საშიშროება უფრო შორ დროისთვის გადაჩო-
ჩდება?

ი. ხალაყაია.

ქ ა რ გ ი პ რ ე ს ა *
(წგწილი პრადიდან)

15 წლის წინეთ—1920 წ.—ჩეხოსლოვაკიის წითელ-
მა ჯვარმა აღდგომის დღესასწაულებში პირველად
გამოაცხადა სამი დღით ზავის ჩამოგდება. ამის შემ-
დეგ ეს ყოველ წელიწადს იმართება. წითელი ჯვარი
მიმართავს რესპუბლიკის ყველა მოქალაქეს თხოვ-
ნით, შესწყვიტონ ამ დღეებში ყოველნაირი პარტი-
ული ბრძოლა და მთელი თავისი აზრი მიმართონ
იქითკენ, რაც ყველას აერთებს და აკავშირებს. დრო-
თა განმავლობაში ამ სახავო ზეიმებმა მიიღეს მეტათ
ფართო ხასიათი,—გადაუჭარბებლად ვიტყვიოთ—სა-
ერთო ეროვნული მნიშვნელობის. ამ ზავის ჩამოგ-
დების გამოცხადება ხდება ყოველთვის დიდ შაბათს
პარლამენტის შენობაში დიდის ზეიმით; ესწრება მას
ჩვეულებრივ რესპუბლიკის პრეზიდენტი და სახელ-
მწიფოს ყველა წარჩინებული პირები პოლიტიკურ,
ეკონომიურ და კულტურულ დარგებიდან. ზეიმს
ხსნის პარლამენტის თავმჯდომარე (წელს ის გახსნა
მისმა ამხანაგმა), მის შემდეგ ლაპარაკობენ მთავრო-
ბის წარმომადგენელი (წელს მინისტრი ბენეში) და
წარმომადგენელი წითელი ჯვარის.

ეს დღეები რასაკვირველია არ ცხადდება დასვე-
ნების და უმოქმედობის დღეებად, პირიქით, ყველას
მოუწოდებენ, მთელი ყურადღება და ცდა მიექცეს
საზოგადო ღონისძიებებს, ეროვნული და სახელმწი-
ფობრივი მნიშვნელობა რომ აქვს. ამ მიხნით წითე-

*) ამ წერილის დაბეჭდვა უადგილობის გამო და-
გვიანდა. რ ე დ.

ლი ჯვარი ირჩევს ყოველ წლებით რაიმე ღონისძიებას, რომლის განსახორციელებლად მოუწოდებს მოქალაქეებს. ასეთ ღონისძიებებში წარსულ წლებში სხვათა შორის იყო: ზრუნვა ჯანსაღი ხალხის აღსაზრდელად, ყველაფერი კარგი ყველაზე უწინ ბავშვებს, პატივისცემა მოხუცებულობას, სისუფთავე ყველგან და ყველაფერში. წელს კი ღონისძიებად გამოცხადდა «კარგი პრესა». ამ ღონისძიებით წითელი ჯვარი ხაზს უსვამს კარგი წიგნებისა და ჟურნალ გაზეთების დიდს მნიშვნელობას ხალხის და ერის ცხოვრებაში.

რა კარგი პრესა?—ამაზე ის გვიპასუხებს ის არის ზნეობრივად უნაკლო, სწორი ინფორმაციის მომწოდებელი, პატიოსანი მებრძოლი თავის იდეალებისათვის და ხელის შემწყობი დადებითი მუშაობისათვის და შემათანხმებელი ყველა კეთილი ნების მქონე ადამიანებისა. ეს არის პრესა—რომელსაც შეგნებულნი აქვს და მუდამ ახსოვს აღმზღველობითი დანიშნულება,—ღირსეული ფორმით და სუფთა ენით რომ მიყავს მკითხველები კეთილშობილ აზრისაკენ. პრესა არის სარკე ერის, მაჩვენებელი მისი განათლების და ზნეობის. სუფთა ერს აქვს სუფთა პრესა და სხვ. თუ გვსურს, რომ ეს ჩვენი ღონისძიება გავრცელდეს მთელ ქვეყნიერებაზე, ვეცადოთ გავატაროთ ის შინ, ჩვენს ოჯახში, ჩვენს მიწა-წყალზე.

ყველა პოლიტიკური პარტიები, ეკლესია ყოველნაირი სარწმუნოების, ყველა მნიშვნელოვანი ორგანიზაციები ესმარებიან წითელ ჯვარს, რომ ეს სამი დღის ზავი გადაიქცეს არა მარტო უძლიერეს გამწმენდელ მოვლენად, არამედ მას მოყვეს პრაქტიკული შედეგი—ეთიური და სოციალური გაჯანსაღება და მართლაც ეს დემონსტრაცია გადაიქცა უდიდეს საზოგადოებრივ გამოსვლად და მას მეთაურობს წითელი ჯვარი, ყველა პარტიების გარეშე მდგომი, რომელსაც ენერგიულიდ მხარს უჭერენ სოციალისტური, დემოკრატიული და სხვა პარტიები. წითელ ჯვარს ყავს მილიონი წევრი და მის მზრუნველობაზეა ნახევარი მილიონი მოზარდი თაობა. თავმჯდომარეა დიდიგან დაარსებისა ქალიშვილი პრეზიდენტ მასარკის, შეიარაღებული ბრძენი მამის მიერ ბევრი კეთილშობილური მორალური და პუმიანიური თვისებებით.

«კარგი პრესის» გამოცხადების ღონისძიება მოყვადილი გამოძახილი მიმდინარე პრესაში, დაფასება თანამედროვე პრესის, მოგონება წასულიდგან, ღირსის აღდგენის და მიბაძვის. იყო ერთი პრაქტიკული შედეგიც. პრეზიდენტის დეკრეტით გაშვებულ იქნა სახალხო წარმომადგენლობა შაბათს 20 აპრილს, რადგანაც მას გაუთავდა კანონიერი წელი და დანიშნულ იქნა ახალი არჩევნები. ერთგულნი წითელი ჯვრის ღონისძიებას, კოალიციური პარტიების თავმჯდომარეები, მინისტრთა თავმჯდომარის და ყველა მინისტრების მონაწილეობით თავს იყრიან და გამოსცემენ მოწოდებას მცხოვრებლებსადაც, რომელიც ურჩევნად დაიცვან სრული რიგიანობა როგორც კრებებზე, ისე პრესაში მთელი სარჩევნო კამპანიის განმავლობაში.

წელს საზეიმო სხდომას—დიდ შაბათს, 20 აპრილს ქონდა მეტად ღირსეული ხასიათი; სიტყვები იგზავნებოდა რადიოთი მთელ რესპუბლიკაში და თავისეული მასა პარლამენტის წინ უცდიდა ზავის გამოცხადების პროცესს დაჭრილი მეომრების ქანდაკების წინ.


პარლამენტის საზეიმო სხდომას დავესწარი როგორც «დამ. საქ.» კორესპონდენტი. მომნიბველი სანახაობა იყო, მზგავსი ღვთის მსახურებისა, სადაც არქიეპისკოპოსი მინისტრების გვერდით მხურვალეთ ტაშს უკრავდა სოციალისტს თავმჯდომარეს და ყველა კი გაერთიანებული იყო ერთი მისწრაფებით—თავისუფალი ეროვნული ცხოვრების შენახვისა. ვფიქრობდით ჩვენს მდგომარეობაზე: ჩვენს სამშობლოში გამეფებულია დიქტატორული პრესა,—მთავრული ძალადობის, სიცრუის, ჭორების, ერთიმეორეზე შეტყვის, ის არ არის საქართველოს სარკე, მაგრამ არსებობს მეორე პრესა, ის უნდა იყოს სარკე ნამდვილი საქართველოსი. შეუძლია კი ქართველ ემიგრაციას სთქვას, რომ მას აქვს კარგი პრესა, სუფთა პრესა? ქართული ორგანო, რომელიც ჩვენს დღევანდელ პირობებში ქადაგებს გათიშვას და დაშლას, მოკლებულია ობიექტიური მსჯელობის უნარს და არ ძალუძს თავის თავი დააყენოს გაერთიანებული ეროვნული ძალების სამსახურში.—ასეთ ორგანოს არ შეუძლია, ამ თვისებით დაიკვეწოს. ვისურვებდით კი, რომ ჩვენს პირობებშიც გამარჯვებულს «კარგი პრესის» ღონისძიება.

გმ. ლ.—მე.

კომუნისტები საქართველოში

(ყოფილი კომუნისტის მოგონება)

დისკუსია ჩქარა ამოიწურა და კრემლის ბრძანების შესრულებას შეუდგა კოლპერაცია და საბჭოთა აპარატი. არავითარი არგუმენტები ქართველი შვილებს და იაკოვლევიზე (ამ.კაკა. მეორე მდივანი) არ მოქმედებდა. მათ ამოძრავებდა კარიერიზმი და ხარბი სურვილი სტალინის წინაშე დამსახურების. კოლპერაციის «დასახმარებლად» ჩამოხვავდა მრავალი მფრინავი ბრიგადები: დონბასიდან, მოსკოვიდან, ურალიდან და სხვ. მთელი საქონელი განადგურდა და გვემა მაინც არ სრულდებოდა. ხელმძღვანელების სამარცხვინოთ საქირო შეიქმნა მათთვის გვემტკიცებია, რომ მოსაგები (მაკე) საქონლის დახვოცვა ხორცისთვის დაუშვებელია. ამ ცდებმაც უნაყოფოთ ჩაიარა, ხვალინდელ დღეზე არავინ ფიქრობდა. სასაკლაოები მუშაობდა დღე და ღამე, გეგმა მთლიანად ვერ შესრულდა, თუმცა—სოფელი გაცალიერდა. საკითხი დადგა ხორცის შენახვაზე და ტრანსპორტზე. არ იკმარა საყინულეებმა და არც სპეციალურმა ვაგონებმა გადასახიდად და ნახევარზედ მეტი ხორცი წახდა. მოახდინეს ახალი ბრიგადების მობილიზაცია დასამაროლებლად, მაგრამ გაფუჭებულ ხორცს ვერც მაროლმა უშველა... ამ გაფუჭებულ ხორცს ურიგებდენ ადგილობრივ კოლპე-



რაციონი მუშებს. ხორცი იმდენად ყარდა, რომ კოლოპერატივში კაცი ვერ შევიდოდა, მაგრამ მოთმინებიდან გამოსული მუშების ცოლები მაინც მივიდნენ კოლოპერატივში, მიღწეეს რაც კი იყო გასატეხი და კოლოპერატორებიც დალახეს.

დამშუულ გლეხებს ჩამოუტანეს დამპალი სიმინდი ჩრდილოეთ კავკასიიდან, მან გააჩინა პელაგრა და ბევრი ხალხი იმსხვერპლა. ამნაირად «აკავშირებს» საბჭოთა ხელისუფლება მწარმოებელსა და მომხმარებელს. ასე პირში ჩალა გამოვლებული დარჩა გლეხი და მუშაც.


სწორეთ ასეთი გლეხების გაძარცვის შემდეგ სტალინი ჩამოვიდა დასასვენებლად წყალტუბოში (ივლისი 1931 წ.). წყალტუბოდან ზუგდიდში გაისეირნა ავტომობილით, მაგრამ როცა ღამით უკან დაბრუნება უნდოდა, ზუგდიდის ხელისუფლებამ მიიღო ცნობა გლეხების აჯანყებზე და გზა, რომლითაც სტალინი უნდა დაბრუნებულიყო, აჯანყებულებს ეკავათ. ზუგდიდელებმა ვანშიამი გაჯიანურეს და ფიქრობდნენ, რომ სტალინს ღამეს იქ გაათევიებდნენ და ამ დროს გზას გასწმენდნენ აჯანყებულებისაგან. მაგრამ ეს ასე არ მოხდა, სტალინი მელამურაა, მან მოინდომა წასვლა და სტუმართ-მოყვარე მასპინძლებს მეტი არაფერი დარჩენოდათ, რომ ეთქვათ უსიმიდლოთ დარჩენილ გლეხების მშვიერ აჯანყებაზე. განრისხებულმა სტალინმა ტელეფონით გამოუძახა ტფილისს, გადააყენა ამ.კავ. საოლქო კომიტეტი, საქართველოს ცეკა და სახკომსაბჭო დამხადების ცუდად ჩატარებისათვის. ხოლო აჯანყებული მშვიერი გლეხები სასტიკად დასაჯა. სტალინი «უცოდველი» მსაჯულია, ის ყოველთვის «მართალია». ზემო აღნიშნული დამხადების დროს მოხდა აგრეთვე აჯანყება გუდაუთის რაიონში.

1930 წლის დეკემბერში მე ვიყავი მივიღებულნი ქურდამირის რაიონში ბამბის დამხადების სახელმძღვანელოდ. იმ დროს ამ.კავკასიაში ბამბის აგროლი იყო გამოცხადებული. ბამბა მოუგროვებელი არსად დარჩენილა, მაგრამ გეგმა მაინც არ სრულდებოდა. სპეციალურ მატარებლით მოსკოვიდან ჩამოვიდნენ, როგორც ბამბის დამხადების მეთვალყურენი ამიერკავკასიაში, კრემლის რწმუნებულები უნშლიხტი (ესლანდელი ჰაეროვანი ფლოტის უფროსი) და არტიუხინა. უნშლიხტს მატარებელზე მობმულ ბაქანზე ორი ავტომობილი ჰქონდა, ის და მისი ჩეკისტები ავტომობილზე მჯდარი ნადირობდნენ ადერბაიჯანის ველებზე. უნშლიხტს მე გავაცანი ბამბის დამხადების მდგომარეობა ქურდამირის რაიონში და განუმარტე, რომ ეგვიპტე, როგორც არა რეალური, ვერ შესრულდება მეტიც. სოფელში მოგზაურობის დროს გვხვდებოდნენ საბანმონურული გლეხები. უნშლიხტმა იფიქრა, ამერიკა აღმდგაჩინეო და თავმომწონეთ გვითხრა: გეგმა აუცილებლად უნდა იქნას შესრულებული, რადგან გლეხები საბანმონურული დადიან, ალბათ მათ ბევრი საბნები აქვთ, უქნათ რეკვიზიცია საბნებს, ოჯახზე მხოლოდ ერთი საბნის დატოვებით და გეგმა გადასრულებული იქნებაო... ადერბაიჯანში სწორად ნახათ ოჯახს ოცი სულისაგან შემდგარს და ხელგაშლილი უნშლიხტი ფიქრობდა,

რომ ასეთი ოჯახი ერთი საბნითაც იოლად წავაო. ეს თავისი უსირცხვილობით შეუდარებელი უნშლიხტის წინადადება ჩვენ არ მივიღეთ, არტიუხინამაც მხარი დაგვიჭირა და გლეხების საბნები გადავარჩინეთ.

ჩაისა და ციტროვანი კულტურებზე გეზის აღება ჩვენში დადებით მოვლენად უნდა ჩაითვალოს თეორიულად. ხოლო ამ უკულმართი ხელისუფლების დროს, ამ კულტურების ჩვენ მეურნეობაში შექრამ გლეხი კიდევ უარეს მდგომარეობაში ჩააყენა, შედარებით მასთან, ვინც ექსტენსიურ კულტურებს მისდევს. საქმე იმაში არის, რომ გლეხს აუკრძალეს სიმინდისა და პურის დათესვა. აიძულეს შემოეღო მის მეურნეობაში: ჩაი, მანდარინა, ფორთოხალი, რამი, თამბაქო, სოია, ბამბა და სხვა. გლეხი ვალდებულია ყოველივე ამის მოსავალი მთავრობას ჩააბაროს, ხოლო მთავრობა გლეხს,—როგორც სამაგიერო ეკვივალენტს,—პურეულობას ვერ აწვდის საკმაო რაოდენობით და ვერც დროზე. ამნაირად, იმის მაგივრად რომ ინტენსიურ კულტურებზე გადასვლით ჩვენი სოფლის კეთილდღეობას ზევით სვლის ტენდენცია დატყობოდა, ის საგრძნობლად დაქვეითდა. ხსენებულ კულტურებში მთავარი ყურადღება ჩაის ექცევა, ხოლო მისი გეგმა ძალიან შორს არის შესრულებისგან. გათვალისწინებულ გეგმით უნდა ყოფილიყო მზად ასი ათასი ჰექტარი, მზათ არის 32 ათასი ჰექტ., ხოლო 32 ათასი ჰექტარიდან ძალიან საეჭვო ხარისხის არის 15 ათასი ჰექტარი და მის მოსავლიანობაზე იმედის დამყარება მეტად უნუგეშოა. მანდარინამ ჩვენში მიადწია საუკეთესო ხარისხს, კარგი ჯიშის ფორთოხალის შექმნა ჯერ ვერ არის მიღწეული, თამბაქო ზუგდიდისა და ანაკლიას რაიონებში არაფრით ჩამოუვარდება სოხუმისას. რამი კარგი ხარისხისაა.

სამელიორაციო და საირრიგაციო დარგებში საქართველოს აქვს პატარა მიღწევები. ალაზნის სარწყავი არხი კარვად დაგეგმილი და კარგი ხარისხის ნამუშევარი გამოდგა, ხოლო მის ამშენებელ ქართველ ინჟინრებს მავნებლობა დასწამეს და გაუსამართლებლად ციხეში ჩაყარეს. ტირიფონის არხი უფრო ნაკლები ხარისხის არის, რადგან ლიანგმა რამდენიმეჯერ დააზიანა არხის სათავე და ბეტონის მილები. ეს არხი კარგ პერსპექტივებს შლის ტირიფონის ველის წინ, სადაც დიდი მომავალი აქვს მაღალ ხარისხოვან მებაღეობას. მეშველის არხიც, რიონზე, დამაკმაყოფილებლად მუშაობს. იყო პროექტები სამგორისა და ელდარის ველების მორწყვის და შირაქში წყალსადენის (სასმელი წყალი) გაყვანის, სამწუხაროდ არ შემძლია ვთქვა, რა ბედი ეწვია ამ პროექტებს. კოლხიდის ჭაობების გაშრობა ძალიან არადამაკმაყოფილებლად მიდის, ეს სამუშევრები მოითხოვს დიდ თანხას, ხოლო იმ პატარა თანხებით, რომელსაც ცენტრი იღებს, ამ დიდი სამუშაოების წარმატებით შესრულება ყოველად შეუძლებელია. ბევრს დაპარაკობენ, მეგრ ფელეტონებს სწერენ და შედეგები კი მეტის მეტად სუსტია. ალბათ კოლხიდის ჭაობების გაშრობა და მისი აყვავება თავისუფალ საქართველოს მოუხდება.



ოკუპანტების ხელისუფლება ჩვენ ტყეებს ვე-
ლურად ანადგურებს. ფილიპე მხარაძე ტყეების გა-
ნადგურებას ძალიან ენერგიულად ებრძოდა, მაგრამ
როცა მოსკოვმა საქართველოს ტყის მრეწველობა
ცენტრს დაუმორჩილა, ფილიპეს პროტესტებს გასა-
ვალი აღარ აქვს. ტყეების განადგურება დიდ ზიანს
უქადის ჩვენს მომავალს და თუ ეს ტემპი დიდხანს
გაგრძელდა, ჩვენი საამაყო ტყე შემოსილი მთები-
ტიტველ კლდეებად იქცევა. გზების მშენებლობა
საქართველოში მეტად სუსტია. კარგად მოვლილია
მხოლოდ სამხედრო (ტფილის-კავკავი) გზა და ძა-
ლიან დაზიანებულია სამხედრო ოსეთის (ქუთაისის-
მამისონი) გზა. სვანეთისა და ბახმაროს მიმართუ-
ლებით პრიმიტიულ გზებს აშენებდნენ.

მრეწველობის დარგში არაფრით შეუძლია დაი-
კვეხნოს საბჭოთა ხელისუფლებამ საქართველოში.
ამ დარგში კრემლის პოლიტიკა ვერ გასცილებია
მეფის პოლიტიკას. სტალინი ამჯობინებს საქარ-
თველოდან ყველაფერი გაიტანოს და გამოფიტოს ის,
ვინემ იქ რამე კაპიტალური შექმნას. ააგეს რამდენ-
იმე იაფი აბრეშუმის სახვევი ქარხანა, ხილის საშ-
რობი ქარხნები, კონსერვის ქარხანა გორში, ბარი-
ტის წისქვილი ქუთაისში, მაუდის ქარხანა ტფილის-
ში, ძალიან საეჭვო ხარისხის, მოდა გასული ძველი
ძველი მანქანებით, ცემენტის ქარხანა კასპში; კარგი
ხარისხის ნავთის გადამამუშავებელი ქარხანა ბათო-
მში, კაპიტალური სადგურებია: ზაპესი, რიონპესი,
აბპესი; შენდება სადგური აჭარის წყალზე. აჭარის
წყალზე პირველი სადგურის მშენებლობას დიდი მა-
რცხი მოუვიდა ორჯონიკიძის წყალობით. რუსეთი-
დან ჩამოვიდა ვილაც ავანტიურისტი ინჟ. ბაშინსკი
და შეადგინა პროექტი მომავალი სადგურის აჭარის
წყალზე, ბათუმიდან 30 კილ. მანძილზე, ხულოს მი-
მართულებით. ჩვენმა ინჟინერებმა უარყოფითი და-
სკვნა მისცეს ბაშინსკის პროექტს. ბაშინსკიმ იცო-
და ორჯონიკიძის დეგენერატობა და უთხრა მას,
რომ ქართველი ინჟინერები ნაციონალისტებია და
სემი პროექტის წინამდებელი მიტომ არიანო. ორჯონ-
იკიძე ყოველთვის მხარაულობდა მხარი დაუპირის
ბაშინსკის ქართველების წინამდებე და დაამტ-
კიცა ბაშინსკის პროექტი. ოთხი წლის განმავლობა-
ში მუშაობა წარმოებდა, 9 მილიონი დაიხარჯა და
მოდიდებულმა აჭარის წყალმა წალკა მთელი ნამუ-
შევარი. ამის შემდეგ დაიწყეს სადგურის შენება იმ
ადგილას, სადაც ქართველი ინჟინერები უარყვედნენ.
იყო პროექტი მეტალურგიის კომბინატის შექმნის
ორპირში, სადაც დაშკესანიდან რკინის მადანი მო-
იზიდებოდა და ტყვარჩილიდან ნახშირი. მოსკოვმა
მისი განხორციელება არ ისურვა. სტალინისათვის
უფრო ხელსაყრელია ურალზე გამაგრება; მას ურჩე-
ვნია კუზნეცკსტროი და მაგნიტგორსკი. ფერრომ-
ანგანის ქარხანა, ზესტაფონში, დღევანდელ პირობე-
ში საქართველოსთვის მახარალებელია, რადგან ის
უადვილებს მოსკოვს მარგანეცის გაზიდვას უცხოე-
თშიც და რუსეთშიც და მით აჩქარებს ქუთათურის
მადნის გამოფიტვას.

სწავლა-განათლების დარგში თვალსაჩინო მიღ-
წევებია. მართალია, ხარისხი სწავლის დაბლა დგას,

როგორც საშუალო ისე მაღალ სკოლაში, მაგრამ
ვიწრო სპეციალიზაციის ინსტიტუტებმა და უნივე-
რსიტეტმა მრავალი სპეციალისტები მისცა საქარ-
თველოს. უმაღლეს სწავლა მიღებულად იმათი ჩარი-
ცხვა არ შეიძლება, მაგრამ ძველ საშუალო ტექნი-
კუმების დამთავრებულებს კი უდრიან. რადგან სას-
წავლებლების რიცხვი ძალიან გაიზარდა, გამოცდი-
ლი პედაგოგიური კადრების დიდი ნაკლებობაა. ძა-
ლიან ჭირს აგრეთვე მოსწავლეთა სახელმძღვანელო
ნივთებით უზრუნველყოფა. ქართული ენა სკოლაში
ძალიან მტკიცედ დგას. რუსოტიპებს ძალიან უწ-
დოდათ რუსული ენისთვის უპირატესობა მიეცათ
ქართულის წინაშე, მაგრამ მიუხედავად მათი დიდი
ცდებისა, რუსული (რუსოტიპები ოქტომბრის ენას
ეძახიან) ენა საგანს ვერ გასცილდა. რამდენად მეტად
დააწვეს რუსულ ენას, იმდენად უკეთ შეისწავლა
ახალგაზდობამ ქართული ენა. საქართველოში ხში-
რად ჩამოდიოდნენ უცხოელი დელეგაციები. მათი
გამართობი ყოველთვის ჩეკისა და კომინტერნის აგე-
ნტებია, ხოლო დელეგატებს მათ აცნობენ როგორც
ქარხნების მუშებს. რა თქმა უნდა დაცდილი ჩეკის
აგენტები თვალთმაქცობას არ დააკლებენ და ანახ-
ვებენ ისეთ ბრწყვიალა რამეებს, რაც სათანადო აგე-
ნტაციის გაწევით «მონათლავს» შეზარხოყებულ დე-
ლეგატებს. ნაცრის თვალში მიყრა მასპინძლებს ძა-
ლიან ეხერხებათ, ამისათვის მატერიალური მდგო-
მარეობაც ხელს უწყობს ხოლმე. საბჭოთა ქვეყანაში
საიდუმლო ფონდები აღემატება ოფიციალურ ფონ-
დებს. როგორც საბჭოთა საზღვარზე ფეხს გადადგამს
დელეგაცია, ის მოგზაურობს უფასოთ საუკეთესო
ვაგონებში და იკვებება უფასოთვე ისე, როგორც
ევროპაში მხოლოდ კაპიტალისტისთვის არის ხელ-
მისაწოდში. მარცვლოვან ხიზილალას ღრმა თევშე-
ბით მიაართმევენ და ძველ კონიაკებს, შამპანიურებს
და კახურ ღვინოებს ხომ ანგარიში არა აქვს. უკან
დაბრუნებისას თითო ყუთს საჩუქრებს «მეგობრუ-
ლად» და «მორიდებით» მიაართმევენ. ყველაფერი ეს
მუშების სახელით ხდება და ერთგვარ ფექტს ტო-
ვებს. კომინტერნის ნაძირალებისთვის უფასო სანა-
ტორიუმები და დასასვენებელი სახლებია. კისლო-
ვოდსკში დიდი ვეებერთელა სანატორიუმი იყო მი-
ჩენილი გერმანელი კომუნისტებისთვის და ასე სხვე-
რისთვისაც. მოგზაურობენ უფასოთ, ექიმობენ უფა-
სოთ, ქეიფობენ უფასოთ. რატომ არ უნდა აქონ
«პროლეტარიატის» დიქტატურა? მართალია ზოგს
ენტუზიასტებს სოლოგაკაც აჩვენეს.—საბჭოთა და
პარტიული აპარატი გაყენითილია კრიმინალიზმით.
ბოროტმოქმედებაში მას ვერ შეედრებიან მეფის
განთქმული მოხელეები. არავითარი დეკრეტები,
სახელმწიფო და საზოგადო ქონების წმინდათა წმი-
ნად და მოცხადების, საქმეს არ შველის. მაღალი
მოხელეების უპასუხისმგებლობა და დაბალი მოხე-
ლეების სიმშობი არის ყველა უბედურების საფუ-
ძველი საბჭოთა აპარატში. ნამდვილი ავაზაკებს, მს-
ხვილ ბობოლებს, საბჭოთა ხელისუფლება ხელს არ
ახლებს, ან და თუ ხელს ახლებს, იმ აზრით, რომ ზე-
ვით ასწიოს სამსახურში. სამაგიეროთ «მეისრეებს»
სვრეტენ და გამოაქვთ ბარბაროსული განაჩენები,



იმისთვის, რომ შიშის ზარი დასცენ ხალხს დაშეშო-სძახონ სტალინის ალილუია სახელმწიფო და საზოგადო ქონების წმინდათა უწმინდესობაზე. აი სულ რამდენიმე მაგალითი: 1929 წელში სასკომსაბჭოში აღმოჩნდა გაფლანგული საიდუმლო ფონდიდან ოთხ მილიონ მანეთზე მეტი. ნამდვილი გამფლანგველები ამ თანხის იყვნენ: სიმონ ჯუღელი, დავით კანდელაკი, თევზ დოღობერიძე, გერმანე მგალობლიშვილი, კოლია ბახტაძე, სამსონ მამულია, სტეფანიანი, ალერქომანიშვილი, ამირალოვი, კოლია სვანიძე, ხოლო ბოროტმოქმედების კვალი რომ დაემაღათ, დახვრიტეს ჩეკაში, გამოუცხადებლად, საიდუმლო ფონდების გამგე ბულბულაძე და მას მოახვიეს თავზე ეს გაფლანგვა. 1930 წელში ჯუღელი წყალტუბოში ისვენებდა, ხოლო საქეიფოთ ყოველ დღე ავტომობილით ვარციხის მამულში ჩადიოდა. ერთი მორიგი ქეიფის დროს მასთან მივიდა მამულის მუშა (უჯრედის მდივანი) და მორიდებით უთხრა, მისი ხშირი ქეიფი სახელმწიფო მამულში ძალიან ცუდად მოქმედობს მამულის მშვიერ მუშებზე და კარგი იქნება, რომ ასე აშკარად არ ხდებოდეს ესო. ჯუღელმა იქვე მოჰკლა ეს მუშა მაუხურით. საქართველოს პარტიულმა სასამართლომ გამორიცხა ჯუღელი პარტიიდან. ორჯონიკიძემ ჯუღელი გაიწვია მოსკოვში, პარტი-აში აღადგინა, საქარ. პარტიულ სასამართლოს საყვედური გამოუცხადა და ჯუღელი დანიშნა საკავშირო ტყის მრეწველობის გამგებობის წევრად, რამდენიმე თვის შემდეგ ჯუღელი დანიშნეს ამ.კავ. მთავრობის თავმჯდომარის მოადგილედ, ესლა ის ტფილისის აღმასკომის თავმჯდომარეა.

დავით კანდელაკმა, განათლების კომისრად ყოფნის დროს, სამხეო ნაწილის გამგესთან კავშირი გააბა და ორასი ათასი მანეთი მოიპარა, მაგრამ ვინც მისი ბოროტება აღმოაჩინა, ის დახვრეტას ძლივს გადაურჩა. ამავე კანდელაკმა საზღვარ გარეთ სამუშეოარი იმით დაიმსააურა, რომ საქართველოს მუხეუმის უნიკუმები. უცხოეთში გასასყიდათ როზენგოლცს (საგარეო ვაჭრობის კომისარიატი) ჩააბარა. კანდელაკს ბერლინის რესტორანებშიც კარგად იცნობენ. ის ხშირად საუზმეზედ ორასი მარკის ხიხილალას მიირთმევს, სრულიად დაწმუნებული, რომ ხიხილალა შაქრის ავადმყოფობას უხდება.

ოცი წლის ყმაწვილი, ფოსტის მოხელე, გეგუქკარი დახვრიტეს 600 მანეთის გაფლანგვისთვის, მიუხედავად იმისა, რომ მან სამსახურის ასრულების დროს მარჯვენა მკლავი დაკარგა, ხოლო სახელმწიფო ქონება ავანაკებს არ დაანება. ამას გარდა, ის წვრილი ოჯახის მრჩენელი იყო, რადგან მამა მისი, მისი დახვრეტის ერთი თვის წინ, ავტომობილმა გაიტანა.

კირილე კაკაბაძე.

წერილი ამერიკიდან

ყველასთვის ნათელია, რომ, თუ ევროპის პოლიტიკოსები კრემლისკენ იცქირებიან, მათთან მეგობრობას აბამენ, პაქტებს სწერენ, ერთ ლიგაში მოყავთ, და სხვა, არა იმიტომ, რომ საბჭოები შეიკვალენ საუკეთესოდ, არამედ მხოლოდ იმიტომ, რომ საბჭოების გადაბირებ-გადმობირება თითქოს საჭიროა ძალების დარაზმისთვის, სხვის შესაშინებლად, გულში კი ყველა წყევლის. ეს კარგად სჩანს ამერიკის პოლიტიკიდან, სადაც არ არის ასეთი ძებნა «მეგობრებისა». ამერიკას ბუნებამ არგუნა, გეოგრაფიულ განცალკევების გამო, დამოუკიდებელი, ან თითქმის დამოუკიდებელი, პოლიტიკა აწარმოვოს.

აქაურმა მთავრობამ შინჯა საბჭოებთან მეგობრობა, მაგრამ სარგებლობა ვერ შეატყუო და საქმე შენეულა. ჩვენ უკვე ვწერდით («დამ. საქარ.» № 111). აქაურმა მთავრობამ როგორ უჩვენა კარი მოსკოვის წარმომადგენელს. ვწერდით აგრეთვე («დამ. საქ.» № 109), რომ სენატის უწყებანა კითხვა რუსეთთან დამოკიდებულების შეწყვეტის... შესაძლებელია კონგრესი ასე შორს არ წაიხდეს, მაგრამ ეს მაჩვენებელია სულისკვეთების. სამაგიეროდ პრესა არ სცხრება ბოლშევიკების წინააღმდეგ საერთოდ და განსაკუთრებით რუსეთის მდგომარეობის გაშუქებაში. იმართება ლექციები იქიდან მოსული პირების მიერ. იბეჭდება წიგნები, წერილები კურნალ-განათეში და სხვა. უკანასკნელ დროთა ლიტერატურაში საყურადღებოა: კარვეთ ველისის წიგნი «კაპუტ»; «აღწერა მოგზაურობისა ლენინგრადიდან არარატამდე». ეს ცნობილი მოგზაური და ამწერი აფრიკის, სამხრეთ ამერიკის და ლაპლანდიის, გამოგზავნილი იყო ჩიკაგოდან ამერიკის გეოგრაფიულ საზოგადოების კლუბის მიერ. წიგნი შეიცავს 264 გვერდს, სურათებს და რუკას...

თავის წინასიტყვაობაში ველისი სწერს: «მე არასოდეს არ მეგონა, რომ ადამიანი ასე დაქვეითდებოდა, ასე ჩაიძირებოდა და ასე დაკარგავდა თავის ადამიანობას, როგორც ეს მოუხდენია კომუნისტების ექსპერიმენტებს... მთელი ჩემი მოგზაურობა იყო კომმარის საძველი თავგადასავალების... მთელი ტრადედია რუსეთისა ის არის, რომ ახლანდელი მოდგმა ახალგაზდა კომუნისტებისა ისე უგუნური და უვიცი იმის, თუ როგორ სცხოვრობს დანარჩენი ქვეყანა, რომ არ იცის, რომ მისი სტანდარტი ცხოვრებისა არის უმდაბლესი ყველა სხვა ქვეყნებისაზე». -ო. ოცი გვერდი ამ საინტერესო წიგნისა დათმობილი აქვს ხევსურეთის პრიმიტიულ ცხოვრების აღწერას. «ხევსურეთი არის მხოლოდ კუთხე საბჭოების ქვეყანაში; სადაც კომუნისტების ხელისუფლება არ განაგებს და ვერ ჰკრეფს ხარკს...» -ო. უმეტესი ნაწილი წიგნისა შეიცავს დამშეულ, შიშველ ტიტველ, ზარდაცემულ და დამონებულ ხალხის მდგომარეობის აღწერას. წიგნს ასე ათავენ: «ბოლოს ჩვენ მზად ვიყავით ბილეთები ჯოჯოხეთისკენ აგველა, ოღონდ გამოვსულიყავით კომუნისტების ნაგავიდან... როცა ფინლანდია-რუსეთის საზღვარს გადავ-



დიოდით, ერთმა მოვლენამ გაგვაზიარა: ჩვენმა მატარებელმა გადაიარა ნახევარი ნაწილი ხიდის, რომელიც წითლად იყო შეღებილი, და შეჩერდა თერთმედ შეღებილ ფინლიანდიის ნაწილზე. მატარებლის მოგზაურები უცბად წამოცვიდნენ, მიიღვეს ხელები ცხვირზე და აჩვენეს სიცილ-ხარხარით წითელ ყარაულებს, რომელნიც ხიდზე იდგნენ, და ფართულ პოლიციელებს, რომელნიც მატარებლიდან ესეც იყო ჩამოხტნენ... საზღვრიდან ასი ნაბიჯის მანძილზე თითქოს განგებ ფინლიანდიელებს მოწყობილი აქვთ საუკეთესო რესტორანი სავსე ყოველნაირ საჭმელებით და ხილეულობით.—ჩვენ დავემსგავსეთ—თუ გინახავთ—დამშეულ ღორების ჯგოფს, რომელიც ესეადა ახალ მოტანილ საჭმელს...»

არ გამოუდგებოთ ბევრ სხვა საინტერესო წიგნებს დაწერილს ამერიკელების და რუსების მიერ. უკანასკნელთა შორის საყურადღებოა ალექსანდრა ტალსტისის, ცნობილ მწერალის ქალიშვილის, წიგნი სათაურით: «მე ვიმუშავე საბჭოებისთვის»...

ფიქრობთ, მკითხველისთვის საინტერესო იქნება, რომ მოვიყვანოთ ზოგიერთი ადგილები ამჟამად რუსეთიდან დაბრუნებულ ამერიკელ მოწინავე კომუნისტების წერილებიდან. ანდრია სმიტმა და მისმა ცოლმა მოათავსეს «ნიუორკის ჟურნალ» ის იენისის ნომრებში, პირველმა თოთხმეტი და მეორემ ოთხი წერილი დღევანდელ რუსეთის მდგომარეობაზე. ეს იმიტომაა უფრო საყურადღებო, რომ ავტორები არიან, თუ იყვნენ დღემდის, აქტიური მუშა კომუნისტები თექვსმეტი წლის განმავლობაში. ა. სმიტი არის სლოვაკი უნგრეთიდან, 51 წლისა, ჩამოსული 28 წლის წინედ. ჯერ იქ სამშობლოში თავის ახალგაზდობაში იყო ლიდერი მალარაების მუშების მოძრაობისა და გაფიცებისა. ამერიკაშიც მალე გამოჩინა თავი. იყო მდივანი ამერიკის სლოვაკების საზოგადოებისა და კორესპონდენტი მათი გაზეთის. 1919 წელში ჩაირიცხა კომუნისტების პარტიაში და მხურვალე მონაწილეობას ეღებოდა მათ ორგანიზაციაში. 1929-ში ვაგზავნილ იქნა რუსეთში სხვა მუშათა დელეგატებთან ერთად რევოლუციის 12 წ. თავზე მოსკოვის დღესასწაულში მონაწილეობის მიხედვად. დაბრუნებისას მოათავსა ვახეთებში ბოლშევიკების დიდი საქებარი წერილები. ეწეოდა მათ სასარგებლოდ პროპაგანდას და მართავდა ლექციებს. 1932 წელს თავისი ქონება (ხუთი ათასი დოლარი) მისცა აქაურ კომუნისტურ პარტიას და თვითონ თავის ცოლით წავიდა რუსეთში სამუდამო საცხოვრებლად, რომ მხურვალე მონაწილეობა მიეღო სოციალისტურ მშენებლობაში. როგორც კარგმა ტექნიკოსმა მუშამ და კომუნისტმა სმიტმა მალე მიიღო საპასუხისმგებლო ადგილი...

«არ ნაირად შეიძლება რუსეთის ნახვა, იწყებს თავის წერილს სმიტი, ისე როგორც შეიძლება ორნორად ნახვა ციხესი—ნახო როგორც სტუმარმა და როგორც ტუსადმა, მე ვნახე რუსეთი ორიგენიარა 1929-ში როგორც «საპარტიო სტუმარმა» და 1932-1935 წლებში როგორც მონაწილემ დამწყვეთული ხალხისა... «1929 წლის ოქტომბერში, როცა მოგხვდით 48 მუშა დელეგატთა შორის, ბედნიერად ვრაცხდით

ჩემ თავს. დელეგატებში ვიყავით მხოლოდ 8 კომუნისტები. ჩვენ ხშირად გვექონდა ფარული კრებები გზაში, რომ მოგვეზადებია და პროპაგანდა გაგვეწია დანარჩენ წევრთა შორის. ბელორუსტოკში, ფინეთ-რუსების საზღვარ-სადგურზე, ჩვენ მიგვიღეს ისე როგორც გამოჩენილი უცხოეთის დიპლომატები. დაგვხდნენ ჯარით, აუარებელ საჭმელ-სასმელით. ლენინგრადში—დემონსტრაციები, სიტყვები, მისალმებები... წაგვიყვანეს სასტუმრო «ევროპა»-ში, რომელიც, გვითხრეს, მხოლოდ მუშებისთვის არის. დაგვატარეს საუკეთესო ავტომობილებში მუხუშუმის, ქარხნების, ბავშვთა ოჯახების და სხვათა სანახავად. ყველგან უფასო სამსახური: გაკრეპა-გაპარსვა, ფესხაცმელის წმენდა, სარეცხი და სხვ. ასე ექცეოდნენ სხვა ქვეყნიდან ჩამოსულ მუშების დელეგატებსაც. ქარხნებში გვითხრეს—აქ მუშა არის ნამდვილი პატრონი თავის თავისო. აქ არ არის უფროსი, ან ზედამხედველი, ყოველი მუშა თავისუფლად მუშაობს. მასთან მუშა უზრუნველყოფილია, აქვს აუარებელი პრივილეგიები და სხვა... საღამოებს ვატარებდით ბანკეტებზე. ჩვენ გვეგონა, ასეთი იყო ყოველდღე ცხოვრება რუსეთის მუშებისა და გვეზარებოდა. მართალია, ხანდახან წავაწყდებოდით უცნაურ მოვლენებს, მაგალითად ვნახეთ ქალები მძიმე სამუშაოზე, მაგრამ მანინვე აგვიხსნეს, რომ ისინი იღებენ დიდ ჯამაგირს და რადგან საბჭოების ქვეყანაში ყველა თანასწორია, ქალებს არ უნდათ კაცებს ჩამორჩენა და სხვა...

«გამოვედით საბჭოების სამოთხიდან, როგორც შემდეგ გავიგე, მოტყუებული. ამერიკაში დაბრუნებისას ჩავები მხურვალე კომუნისტურ პროპაგანდაში და ბოლოს გადავსწყვიტე, ჩემი ცოდნა და ძალა შემეწირა სოციალისტურ ქვეყნისთვის...

«პირველი ცივი შეხვედრა ისეც იქ იყო, სადაც ასე დიდებულად შეგვხვდნენ 1929-ში. ახლა დაგვხვდა უხეში მოხელე, ამოგვიყარა ყველაფერი ტალახზე, არ დაგვიტია ჯიბეები გაუჩხრეკლად. შევეტყვე ზოგიერთებს ასე სასტიკად არ ეპყრობოდნენ. ვკითხე მიზეზი ერთ ნაცნობ მოგზაურს. მიპასუხა—თქვენც მიგეცათ ორი-სამი დოლარი, და ყველაფერი ადვილად ჩაიარდა. დავიწვი სირცხვილით, მაგრამ ცუდი აზრები შორს გავიფანტე... ვაჩვენე ჩემი მოწმობა, რომ 5.000 დოლარი შეწირული მქონდა კომუნისტურ პარტიისთვის და დარჩენილი ასი დოლარი ვსთხოვე დაჩუქნადავებია. ამაში მივიღე 197 მანეთი და მოწმობა, რომ «ტორგსინში» ამ ფულს ოქროს ფასად მიიღებდნენ. სამი კვირის მერე წარვადგინე ეს ქალაქი, მაგრამ მითხრეს, ესლა სხვა ვანკარგულება არისო, ასე რომ ჩემი ასი დოლარი მარტო ორი დოლარის ფასად გადაიქცა...

«მოსკოვის «ელექტროზავოდ»-ში, სადაც მე ვმუშაობდი, საკვირველი სისტემა ვნახე. 24.000 მომუშავე ორ კლასად იყვნენ დაყოფილნი: ინტელიგენტური და უბრალო მუშები. სადაც პირველთა უმეცდნენ, იქ მეორეებს არ შეეძლოთ შესვლა. ეს თითო კლასი იყო დაყოფილი ცხრა კატეგორიად. კატეგორიებში განსხვავება იყო ხელფასში და სურსათ საჭმელის მიღებაში. უმეტესობის ხელფასი ისე მცირე



იყო, რომ არ ყოფნიდათ სასაქონლისთვის, რომელიც ისეთი საძაგელი იყო, რომ მსგავს ამერიკაში ღორებსაც არ აძლევენ...

«მუშაობის პირობები და სისტემა იყო აუტანელი. ქონდათ შემოღებული ნაპრობით სამუშაო, იმი სთანა მექანიკურ განყოფილებებშიც, სადაც წარმოუდგენელი იყო სწორი ანგარიში და დაფასება. ამ სისტემას ყოველ ქვეყნებში მუშები ებრძვიან და მეც მალე პროტესტი განვაცხადე, რასაც მოყვა ჩემი თვიურ ჯამაგირზე გადაყვანა და მდგომარეობის გაუმჯობესება, მაგრამ რუსების მუშებისთვის ისევე ის დარჩა. მუშებს რომ სასაქონლის საყოფნო ხელფასი მიეღოთ, ათი და მეტი საათი უნდა ემუშავათ დღეში. მე რეკი «მოხალისედ» ან «სუბოტნიკად» უფასოდ უნდა ემუშავათ. წინააღმდეგობისთვის «დამნაშავე» შავ დაფანე იწერებოდა და სასტიკად ისჯებოდა. მე ბევრი რამ ცუდი მინახავს უნგრეთის მადარებებში და თვითონაც დავსჯილვარ იქ, მაგრამ არ მინახავს ასეთი სასტიკი და უხეში სისტემა, რომელიც დაწესებულია სტალინის მიერ. საბჭოების მთელი სისტემა აგებულია ძალდატანებაზე. ტყუილებია და ბოლშევიკების პროპაგანდაა, ვითომც რუსეთში თავისუფლებაა მუშისთვის. პირიქით, ძალადობითი და ფეოდალური სისტემაა ყველგან. მუშის კენესის გამგონი არავინა არის... მინახავს ავადმყოფი მუშები, აწუთი სიცხით რომ იძულებული იყვნენ ემუშავათ. მუშების სიცოცხლე არაფერად ფასდებდა. საერთოდ, ადამიანის სიცოცხლე უიარვესი საგანია საბჭოების ქვეყანაში. პრესა სდუმს, არ ამხილებს მუშების გაჭირვებას. პრესამ კარგად იცის, როგორ ხშირად «იკარგებიან» მუშები სამუშაოდან და სახლებიდან, მაგრამ ამის გამომქდავენებას ვერ ბედავს... ერთხელ გასამართლებას დავესწარი. პასუხისგებაში იყო მიცემული ათი ახალგაზდა 19-22 წლისა—მანქანი წრილმანი ნაწილების მოპარვისთვის. დამცველი იყო ახალგაზდა კომუნისტა კავშირის წევრი, რომელმაც მჭრამეტყველად დაახასიათა დამნაშავეთა მდგომარეობა, რომ შიმშილმა აიძულა ისინი მოეპარათო. დარბაზი გავსებული იყო ათასზე მეტი ხალხით, რომელმაც მხურვალე ტანისცემით დააჯილდოვა დამცველი... ათსავე მიუსაჯეს ათ ათი წლის ციხე და ერთი თვის მეტი უკვალოდ დაიკარგა ახალგაზდა დამცველი. კაცმა არ იცოდა რა დაემართა, მაგრამ ყველა გრძობდა და მიმდებარეობდა იყო... დიახ, დანაშაულობაა ახრის გამოთქმა... ერთი ჩვენი მუშა ურალში გადაიყვანეს ტყის სასურველად იმიტომ რომ მან გაბედა იმის თქმა, რომ არაფერი ქონდა სასაქონელი... აუარებელია ასეთი მაგალითი...

«მე ცხოვრობდი სოკოლნიკის ციხის ახლო და მოწმე ვიყავი ბევრი სისაძაგლის... რუსეთის მუშა, მოტყუებული თავის ლიდერების მიერ და გაცემული სახლვარ გარეთელ მუშების მიერ, სულს დაფავს შიშისა და შიმშილისგან...

«ხანდახან მე ვნახულობდი ნაცნობ მუშებს მათ ბინაზე. ზოგიერთები ცხოვრობდნენ 500-600 სულთან ერთად ერთ ოთახიან ყახარბაში; ბევრი ცოლიანი იყო. ზოგიერთებს თივის საწოლი ჰქონდათ, ზოგიერთებს არაფერი, იწვნენ ცარიელ იატაკზე, ან ყუთებზე

უბალიზოთ, უსანთლოთ. მეკითხებოდნენ მუშების მდგომარეობაზე ამერიკაში. მიუხედავად ჩემი პრინციპილურ წინააღმდეგობისა კაპიტალისტურ სისტემის მიმართ, უნდა სიმართლე მეთქვა, რომ იქ მუშევეარი არ შიმშილობს, რომ მე და ჩემ ცოლს ექვს ოთახიანი ბინა გვქონდა ყოველწლიურ მოწყობილებით, ავტომობილი, რადიო და სხვა. მათ ბინაზე დიდ ხანს ვერ ვძლებდი, ვერ ვიტანდი აყროლებულ ჰაერს... და ასეთი ცხოვრება ჰქონდა ჩვენი «ელექტრონავოდის» 11.000 მუშას. და ეს «ზავალი» ითვლება მოდელად, საუკეთესოდ... მუშები ვერ ბედავდნენ ლაპარაკს პოლიტიკასა და მატერიალურ მდგომარეობაზე, ორი-სამის გარდა, ვინც მე მენდობოდა, მაგრამ ეტყობოდა, ყველა გამსუვალული იყო სიძულვილით სტალინის რეჟიმისადმი. ყველა ოცნებობდა, რამე შემთხვევა მომხდარიყო, რომ მთავრობა გამოცვლილიყო. ყველა მოხარული იყო რამე კატასტროფისა, რომ თავი დაეხწიათ ყმობისთვის...

«მე არ შემეძლო მოთმენა ამ უსამართლობისა, რომელსაც ვხედავდი გარშემო. ხშირად ვეუბნებოდი უფროსებს, ვწერდი კომიტეტებს, მაგრამ არაფერი გამოვიდა. ბოლოს მივწერე თვით სტალინს. მიუთითე მუშების შიმშილსა და უმწეო მდგომარეობაზე. აგრეთვე აღვნიშნე ჩვენი ქარხნის უწყისობა და მოვითხოვე რევიზია. სხვათა შორის სტალინის ასე მივწერე: «მე ვიყავი უბრალო მუშა შეერთებულ შტატებში, აქ კი გამხადეს ინიჟინერი. ეს წარჩინება მივიღე იმიტომ, რომ დირექტორებს უნდოდათ ჩემი დაქმნაყოფილება, ჩემი გაჩუმება. ნუ თუ თქვენ ფიქრობთ, ამხანაგო სტალინ, ჩვენ წავიწვიით წინ ამისთანა მდგომარეობაში? რუსეთის მუშები ხედავენ, რა უსამართლობა ხდება აქ ყველგან. რუსეთის მუშები ხედავენ, რომ მათი ქარხნის უფროსებმა არაფერი იციან, მაგრამ კარგად ცხოვრობენ. ამიტომ რუსეთის მუშებს ექვი ეპარებათ მომავალ სოციალისმის, და აი ეს არის მიზეზი რომ მუშები აფუქებენ ყველაფერს... ეს და სხვა ჩემი საჩივრები მხოლოდ ბიუროკრატიული უკმაყოფილო შეკითხვებით გათავდა...

«ნერონი თამაზობდა, როცა რომი იწვებოდა! სტალინი «მადარი რუსეთის» სინემატოგრაფიულ სურათებს იღებდა, როცა ხალხი შიმშილით იხოცებოდა. ეს იყო პასუხად ჰიტლერის კამპანიისა, რომ რუსეთში მყოფ დამშუელ ვერძმანელებს დახმარებოდა... რომ დამტკიცებოდა უცხოელ ქვეყნებისთვის, რუსეთში შიმშილობა არ იყო, და ყველაფერი ჰიტლერის და სხვების პროპაგანდა იყო, 1933 წლის სექტემბერში, როცა რუსეთი შიმშილით იხოცებოდა, საბჭოების მთავრობამ მოაწყო ექსკურსია 200 კაცი-საგან შემდგარი. მთავრობამ ადრე გასცა განკარგულება, ქარხნებს აერჩიათ მომეტებული უცხოელი კომუნისტი მუშები ამ მოგზაურობისთვის. ამ სასიოცხო ექსპედიციაში «ელექტრონავოდის»-დან მე ვიყავი წარმოდგენილი. ამ ორას კაცს სათავეში ედგათ 50 მთავრობის წარმომადგენელი, კორესპონდენტები, სურათის გადამღებნი და სხვა. ჩვენ განკარგულებაში იყო გემი «კომსომოლეც», რომელიც გავსებული იყო სასაქონლ-სასმელით. ქალაქ გორვიდან (ნი-



ქნი ნოვგოროდი) ასტრახანამდე შეეჩერდით ათიოდე ქალაქში, სადაც უხვად შემოქონდათ საუმელ-სასმელი ჩვენ გემში და სადაც ქეიფით გვიღებდნენ. აქედან იგზავნებოდა დეპუტები, რომ «კოლონისტებში» გამძღარნი არიან... მიუხედავად ყოველ წომეების მიღებისა, ჩვენ ვხედავდით საძაგელ სურათებს: ძონძებში გახვეულებს ერეკებოდნენ, რომ ახლო არ მოსულიყვნენ და რომელიმე ყვიროდნენ და გვთხოვდნენ: პური, პური მოგვეცითო...

დაბრუნებისას ცენტრალურ პარტიულ კომიტეტს მზად ქონდა ჩვენთვის რეზოლუცია, რომ გერმანელი კოლონისტები მდიდრად და მხიარულად არიანო, რომელზედაც ყველას უნდა მოგვეწერა ხელი. ზოგი იძულებული ვიყავით რადიოში გველაპარაკა. სიტყვების ტექსტი რადიოს კომუნისტურ კომიტეტისთვის უნდა მიგვეცა მოსაწონებლად. ჩემი მომხადებელი ტექსტი სამჯერ იქნა დაწუნებული. ბოლოს მომცეს მათი დაწერილი ოფიციალური ტექსტი, რაზედაც, როგორც პარტიის წევრს, უარის თქმა არ შემეძლო...

რადიოზე წავიკითხე კომიტეტის წერილი, თუ როგორ რა ვნახე და რა კარგი შთაბეჭდილება მოახდინა ჩემზე მოგზაურობამ, და ამისთვის მივიღე 250 მანეთი.

ნათრი.

იტალიელი შუკნალისტი რუსეთში

«Corriere della Sera»-ს თანამშრომელს ბ. ბეონი ბროჩიერს ჰაეროპლანით უმოგზაურნია საბჭოთა რუსეთში აღმოსავლეთ ციმბირამდე. ბ. ბროჩიერს შემთხვევა ჰქონია დაეთვლიერებინა დიდძალი ქალაქები და მკითხველს უზიარებს თავის შთაბეჭდილებებს ნახულიდან, იმ წერილებში, რომელიც დაუწერია, როგორც კი რუსეთს მოშორებია. ჩვენ ვსარგებლობთ ერთ იმ წერილს, რომელიც მოთავსებული იყო «პოლსკა ზბრონია»-ში 27 მაისს 1935 წ. ბ. ბროჩიერი სწერს: დღეს საღამოდან, ე. ი. იმ წამიდან, როცა ჩემი ჰაეროპლანი დაეშვება პოლონეთის პირველ პანგარში, ექვს გარეშეა მივიღებ შთაბეჭდილებას, რომ ვითომდა ხელახლა დავიბადე. ამ დროიდან ბოლო მოეღება მევაფონების ყვირილს, რომ ბურჟუაზიულ ქვეყნიერებას კატასტროფა მოელოს, და გუნდრუჟის კმევას პროლეტარიატის დიქტატურისთვის; ბოლო მოეღება უსიტყვო ბრბობებზე მხერას, რომელნიც დაფლეთილ ტანთსაცმელში, მთელი საათების განმავლობაში სანოვაციის დეჟანების წინ არიან აყუდებულნი. ვერ დავინახავ რევოლუციონურ ფურცლებს და სიმბოლიურ ილუსტრაციებს, რომლებშიდაც წარმოდგენილია ბავშვების, ქალების და მუშების ხოცვა-წამება სისხლის მსმელ კაპიტალისტების, იმპერიალისტურ ოფიცრების და მომხადებელ სამდღელოების მიერ. ჩემი თვალები ვერ დანახავენ უღვთოთა პროფანაციებს, გინებით აღსავსე წერილებს ყოველივე იმის წინამდეგ, რაც სხვა ერების მორალურ საფუძველს შეადგენს. არ

მომეცემა საშუალება ვიკითხო განეტებში, ბროჩიერებში, ტრანსპარატებზე, რომ ქვეყნიერებას განაგებენ დანაშაულთა, მკვლელთა, დევგნერატთა, უსაქმოთა და კაცთმუხამელთა ბრბონი და რომ მხოლოდ ბოლშევიკების ატმოსფეროში პროლეტარიატი სუნთქავს თავისუფლად, რომ მხოლოდ ამ ატმოსფეროში იგი სარგებლობს კოლექტურ ავლადიდებას და სოციალურ განახლებას.

მაღლობა დმერთს, ყოველივე ამას ბოლო მოელო—განაგრძობს ბ. ბროჩიერი—ისე მაქვს წარმოდგენილი, რომ ციებ-ცხელების შემდეგ ერთბაშად მოვკეთდი, რომ განვთავისუფლდი გულშემზარავ სინძრისაგან. და როდესაც ვფიქრობ ჩემს მდგომარეობაზე, როგორც უცხოელის, რომელსაც რამდენიმე წამის შემდეგ შეუძლიან, ჰაეროპლანის ფრთებზე დასტოვოს ღერმეტიულად დახურული სახდერები, სიმწარით ვფიქრობ იმათზე, რომელნიც იქ დარჩნენ, სამუდამოთ ჩაკეტილნი, ყოველგვარ იმედს მოკლებულნი, რომ ოდესღაც შესძლებენ ამ სახდერებს გასცილდნენ. აი სინამდვილე მთელი რუსეთის მოსახლეობის. არც ერთ ერს არ განუცდია ასეთი ხანგრძლივი ტუსალობა. მეორე მხრივ გულახდილად უნდა ითქვას, რომ საქმეა მეტად მოკლე დრო გაატარო რუსეთში, რომ დარწმუნდე, რომ ეს 160 მილიონიანი ხალხის სატუსალოში მოქცევა არის აუცილებელი პირობა იმ წყობილების შესანახად, რომელიც იქ არსებობს. წარმოვიდგინოთ ერთ წამს, რომ მოისპო საპარსპორტო შენდუდანი, რომ გლეხებს და მუშებს შეუძლიათ ამ სატუსალოს მოშორდნენ და ისევ დაბრუნდნენ, უამბონ სხვებს, თუ რა ხდება სხვაგან,—ცხადია დაინგრევა ყოველივე ის, რაც ეყრდნობა მარტო პოლიტიკურ პროპაგანდაზე.

კედელი, რომელიც აშორებს საბჭოების რუსეთს სხვა ქვეყნებს—უნგრევია. ერთ წუთსაც, რომ წარმოვიდგინოთ, რომ ის დაინგრა, ნამდვილ წარღვნას ექნებოდა ადგილი. მაგრამ ეს კედელი მაგრადაა აშენებული. მილიონობით განწირულნი მის საფუძველთა გასამაგრებლად მუშაობენ.

საზღვართა დასაცავად უთვალთვალდებენ არმატები, კარბინები და საომარ საშუალებათა უზარმაზარი აპარატები. და ეს საშუალებანი გლეხ მუშათა შიმშილით ნახლავდებან. რომ ყოველივე ამის დანახვა შესაძლებელი იყოს ხალხის დისციპლინის, პატრიოტული ან სამხედრო სულისკვეთების თვალსაზრისით, ეს იქნებოდა აღმაფრთოვანებელი, საუცხოვო რამ, რომელიც დაახსიათებდა დიდ ერს: მაგრამ თუ შევხედავთ ამას კომუნისტური პროპაგანდის თეორიული საფუძველების თვალსაზრისით, დავინახავთ მასში განუსაზღვრელ კონტრასტს. და მართლაც ეს ყველა ქვეყანაზე უფრო მილიტარისტული ქვეყანაა, რომელიც თავის მოქალაქეებს უნერგავს მხოლოდ და მხოლოდ შეიარაღების იდეას, სწორედ ეს ქვეყანა იბრძვის «ბურჟუაზიული იმპერიალიზმის სამხედრო სულის» წინამდეგ. და ბოლშევიკური რევოლუცია ხომ აღმოხეტქდა ანტიმილიტარისტული და საერთო თანასწორობის საერთაშორისო მიზნის წინამდეგ.

საბჭოების აღზრდის სისტემაში იჭედება მხოლოდ თავდასხმის და დაპყრობის სული. ახალგაზრდათა აღსაფრთხელებლად შექმნილია საბრძოლველი ტონი და საჩხედრო ნომენკლატურა თვით სამეურნეო ცხოვრების დარგში. მთელი ცდანი ე. წოდებულ გეგმიანობისა აფერადებულია სტრატეგიული სიმბოლოებით სხვადასხვა «ფორტების», «თავდასხმელ ბრიგადების», «თავდასხმის და კონტრატაკის», «პარტიის მსუბუქი კავალერიის» და სხ.

მხოლოდ იმათი მდგომარეობაა უზრუნველყოფილი, ვინც მოკალათებულა საჩხედრო უმაღლეს სფეროებში, პოლიციის შტაბებში; იმათი, რომელთაც შეძლება გააჩნიათ, პოლიტიკური გავლენის წყალობით მოხვდნენ უნივერსიტეტში და მიიღონ დიპლომი. ჩემი მოსკოვში ყოფნის დროს დამთვალეირებინეს ერთი სასწავლებელი. ვესაუბრე მოწაფეებს, გამოვკითხე თუ რა გეგმები აქვთ მომავლისთვის. მიპასუხებდნენ: მინდა ვიყო ქიმიკოსი, წითელი არმიის ჯარის კაცი, მფრინავი, პროფესორი, ასტრონომი, ექიმი, მეზღვაური, მაგრამ არც ერთისაგან არ გამიგონია, რომ მინდა ვიყო მიწის მშრომელი ან მუშა. და ეს გლეხთა და მუშათა რესპუბლიკაში!

კავკასიის ერთადერთი დამოკიდებლობის

საერთო დღესასწაული ქ. ვანშავაში

მიმდინარე წლის პირველ ივნისს ვარშავის ერთ-ერთ კლუბის დარბაზში გადახდილ იქნა კავკასიის ერთადერთი დამოუკიდებლობის საერთო დღესასწაული, რომელსაც დაესწრო ვარშავაში კავკასიელთა კოლონიის დიდი უმრავლესობა და წარმომადგენლები პოლონეთის სხვადასხვა საზოგადოებრივი ორგანიზაციების.

პრეზიდენტში ადგილი დაიჭირეს აზერბაიჯანის წარმომადგენელმა ალიბეიმ, მთიულეთის მადომედ გირეიმ და პოლონეთის ქართული კომიტეტის თავმჯდომარემ ქ. იმნაძემ.

სადღესასწაულო კრება გახსნა ქართული კომიტეტის თავმჯდომარემ ქ. იმნაძემ, რომელმაც მოუწოდა დამსწრეთ ფეხზე აღგომით პატივი ეცათ პოლონეთის ერის უდიდეს ბელად მარშალ პილსუდსკის ხსოვნისთვის, რის შემდეგ წარმოსთქვა პოლონურ ენაზე შემდეგი სიტყვა:

«კაცი ბომბის, ხმალის და კალმის—ეს ფანტასტიური შეზავება მოქმედების და აზროვნების იძლევა მთელ რიგს საგმირო საქმეებისას»,—ამბობს პრეზიდენტი ქორდანია თავის წერილში, რომელიც მიძღვნილია პოლონეთის ერის დიდ ბელად მარშალ იოსებ პილსუდსკისადმი.

დღეს კავკასიის ერთადერთი დამოუკიდებლობის დღესასწაულზე, არ შეიძლება არ მოვიგონოთ უწინარეს ყოვლისა ის ლეგენდარული პიროვნება, რომლისაგან მიპყრობილი იყო მთელი მსოფლიოს ყურადღება და პირველ რიგში კი ტყვეობაში მყოფ

ერთა, რომელნიც იბრძვიან თავიანთ დამოუკიდებლობისათვის.

მანათობელ და გზის მაჩვენებლად დარჩება ის მარად დამოუკიდებლობის და თავისუფლებისთვის მებრძოლ კავკასიის ერთათვის. დიდი, ძლევამოსილი სული დიდი მარშალის თავს დავეტრიალებს და მოგვიწოდებს ამ მიმე ბრძოლაში გამძლეობისაკენ, ქედ მოუხრელ სიმტკიცისა და თავდადებისაკენ იმ იდეების განსახორციელებლად, რომელსაც შესწირა მან მთელი თავისი სიცოცხლე.

ის იყო თავის ერის გზის მაჩვენებელი, გახდა ის გზის მაჩვენებელი მონობაში მყოფ ერთათვის.

მისი სული მოგვიწოდებს ჩვენ—კავკასიელებს: «წინ—გამარჯვებისაკენ». კავკასია უკან არ დაიხევს—გასწევს წინ!

ჩვენ გავიმარჯვებთ!»

შემდეგ ლაპარაკობს აზერბაიჯანის წარმომადგენელი მირზა ბალა, რომელიც ჩვენ გამარჯვებას ხედავს კავკასიის ერთა მტკიცე კავშირში და ასრულებს თავის სიტყვას შემდეგი სიტყვებით:

«კავკასია გაიმარჯვებს მხოლოდ ერთად დგომით, ერთად ბრძოლით» ო.

აზერბაიჯანის წარმომადგენლის შემდეგ თავმჯდომარე სიტყვას აძლევს აღმოსავლეთის ინსტიტუტის გენერალურ მდივანს პროფესორს ო. გურკას. კავკასიის ერთა დიდი მეგობარი ბ. გურკა ცნობილი ორატორია. ლამაზ ფორმებში ჩასხმულ სიტყვაში; პროფ. გურკა, კავკასიის ერთა გამარჯვებას ხედავს მტკიცე, ქედმოუხრელ ბრძოლაში.

შესაფერი სიტყვა წარმოსთქვას აგრეთვე მთიულთა წარმომადგენელმა ინკინერმა ბილატიმ და ყირიმის ბ. ზინბიმ.

უკრაინის სახელით მოულოცა და შეერმეტყველურ სიტყვაში უკრაინულათ უსურვა გამარჯვება მოკავშირე კავკასიის ერთ პოლონეთში უკრაინის ემიგრაციის კომიტეტის თავმჯდომარის ამხანაგმა D-r შკურატმა.

ბ. შკურატის შემდეგ სიტყვა ეძლევა პოლკ. კი-ანუშბევს, რომელმაც, განჯის ცნობილ აჯანყების 15 წლის თავის აღსანიშნავად, კრებას გააცნო ამ აჯანყების ზოგი ეპიზოდები და გამოსთქვა იმედი, რომ მომავალში თავისუფალი კავკასია სოლიდარულად და მტკიცედ დაიცავს თავის თავისუფლებას.

დაბოლოს სენატორი სედლეცკი, აღმოსავლეთის ინსტიტუტის თავმჯდომარე, —საქართველოს და კავკასიის ცნობილი გულწრფელი მეგობარი, კავკასიის ტერიტორიაზე მოზინადრე ერთა საკითხს უდგება მეცნიერულის თვალსაზრისით. სენატორმა სედლეცკიმ ხაზი გაუსვა იმ გარემოებას, რომ ეს ერთი უხსოვარ დროიდან ამ ტერიტორიის მკვიდრნი —აუტოხტონები არიან, რაც ამ ერთა გამარჯვების ერთ თავდებთაგანია.



კრება ერთხმად ლებულობს წინადადებას გაეგზავნოს მისალოცი დეპუტა კავკასიის ერების ბელადებს.

თავმჯდომარე, უნდის რა მადლობას სტუმრებს, იწვევს მათ ჭიქა ჩაიზე.

ქართულმა კომიტეტმა 26 მაისის დღესასწაულის აღსანიშნავათ წირვა გამართა მართმადიდებელთა საკათედრო ტაძარში. კავკასიის ემიგრაციასთან ერთად წირვა მოისმინეს პოლონეთის სხვა და სხვა ორგანიზაციების და უკრაინელთა წარმომადგენლებმა. სწირა მღვდ. გრ. ფერაქემ.

ჩრდილო-კავკასიელთა შორის

ამ რამდენისამე თვის წინად ვარშავის აღმოსავლეთის ინსტიტუტთან დაარსდა საგანგებო კომისია, რომელმაც მიზნად დაისახა ერთის მხრით საერთო ანბანის შემუშავება ჩრდილო-კავკასიისათვის და მეორეს მხრით გამორკვევა გზებისა, თუ როგორ შეიძლება შეიქნეს საერთო ენა ჩრდილო-კავკასიელ ტომებისათვის.

კომისიაში შევიდნენ: ინსტიტუტის გამგეობის თავმჯდომარე სენატორი სტ. სედლეცკი, ინსტიტუტის გენერალური მდივანი პროფ. ოლგ. გურკა, პროფ. სტ. პონიატოვსკი, პროფ. ან. ზაიანჩკოვსკი, პროფ. მიხ. დომაშვილი და მთიელების მხრით—ბაგაედინ ხურუ, ჰუსეინ კუმუზ, მოჰამედ ჩუკუა, ბარასბი ბაიტუგან, ქანბეგ ხავუკო, ბალო ბილატი, იუსუფ უმაშ.

რამდენისამე წინასწარი სხდომის შემდეგ კომისიამ გადასწავიტა, რომ ჩრდილო-კავკასიის მომავალ საერთო ანბანს საფუძვლად დაედვას ეგრედ წოდებული ახალი თურქული ანბანი, რომელიც უკვე შემოღებულია საბჭოების მიერ აღმოსავლეთის «ავტონომიებში» და კერძოთ ჩრდილო-კავკასიაშიც.

რაც შეეხება საერთო ენას ტომებს შორის, კომისია შეჩერდა ყუმისურ ენაზე (ყუმისური თურქულის ერთი კილოთავანია). გადაწყდა, რომ ამ ენაში შეიტანონ ყველა ის სიტყვა, რომელიც საერთოა ჩრდილო-კავკასიურ ენების უმეტესობაში. კომისიამ ქამდის უკვე აღმოაჩინა ასამდე ასეთი სიტყვა.

უკრაინელთა შორის

უკრაინის კომუნისტური პარტიის გენერალურმა მდივანმა, სტალინის მარჯვენა ხელმა, პოსტიშევმა უკრაინელ მწერალთა ყრილობაზე კიევში სიტყვა წარმოსთქვა და ასე დაახასიათა «კონტრ-რევოლუციონური» მოძრაობა უკრაინაში საბჭოთა ხელისუფლების დამყარების შემდეგ: იყო სამი ეტაპი, სთქვა: პირველი დასრულდა დაახლოებით 1928 წელს, მას ხელმძღვანელობდენ შუმსკი და ხივლოვი, რომელთა დევიზი იყო გამოყოფა რუსეთისაგან არა მარტო პოლიტიკურად, არამედ ლიტერატურადაც. «ჩვენ არ გვჭირია რამე ვისწავლოთ მოსკოვისაგან, ამბობდენ ისინი: ჩვენ უნდა დავუახლოვდეთ ბურჟუაზიულ ევროპას». მეორე ეტაპი იყო 1928-1933 წლებში, რომლის სულის ჩამდგმელს წარმოადგენდა სახალხო კომისარი სკრიპნიკი. უკრაინელი მწერლები თავის ნაწერებში ხატავდენ საბჭოების ბატონობას როგორც უცხო და გარდამავალს და კომუნისტთა ლიდერებს წარმოადგენდენ როგორც გადაგვარებულებს და გიყებს. მესამე პერიოდი დღეს—ესაა პირდაპირ ტერორიზმზე გადასვლა და მზადება აჯანგებისა საბჭოების წინააღმდეგ.

ძართველები პოლონეთში

კრაკოვში გაემგზავრა ვარშავიდან სამოცი კავკასიელი, რომელთაც ეროვნული დროებით პატივი სცეს სოვინეტში იოსებ პილსუდსკის საფლავს. ქართველებმა მიიტანეს საქართველოს მიწა და დააყარეს იმ გორაკს, რომელიც უნდა აღიმართოს დიდი პოლონელის ხსოვნისათვის.

ქართული ოფისი

გადავიდა ახალ ბინაზე:
38 rue Boileau, Hameau Boileau. მეტრო № 8: სადგურები Chardon Lagache ან Molitor.
ოფისი ღიაა ნაშუადღევს 3-დან 6 საათამდის.

ბ ი ა ნ კ უ რ უ ი

«დამოუკიდებელი საქართველო» იყიდება
დ. ქვლქვლიანთან
93, Av. Ed. Vaillant, 93.